

CIKONDO NÈ CIMANYINU

CYÀ DIDISANGA



Beetwabu diloolo edi. Ndyèsè bwa kwikala kaaba aka diloolo edi, ne kwikala mwimane kaaba aka.

² Mêmè, mu dinda emu, ngenda mpweka ne njila... Ncivwa mfuminaku ku disambila, mwindile Mukalenge. Kadi pânkaavwà ngenda mpweka ne njila, mêmè kukangula cisanji bwa kuteeleja mwambi kampanda utu uyiishaku, Mwaneetu Smith, mwaneetu wa bafiiike (nwênù bônso nuvwaku bamuteeleje mu dinda emu anyi? Nansha umwe wa kunudi?) mwamwa mu, ngeela meeji ne mmu Ohio. Muntu kampanda uvwa ungambila muvwaye uyiisha, nenku wamba ne: “Bivwa bikengela wêwè kukangula cisanji bwa kumuteeleja,” mushindu ewu.

³ Kwenzekabi ne mmupete, mu dinda emu. Ncya bushuwa ne ùvwa wàmba mushindu ukaadi mpekaatu wenda uvulangana pa buloba leelu ewu, nenku uvwa... Ke mêmè kuseemeja kalonda ndambu, kadyomba kàvwà kalondele kòkò aku, ke mêmè kupweka kadi kuteeleja mukwabo. Dìbà dîngàáfikì apa, nkaavwa anu pabwìpì ne kudikonka ne dìbà kadivwa dimane kupita dya kufika mu ekeleeziya anyi, mu dinda emu pângàábwedì. Pa nanku, bushuwa tudi ne dyèsè dya kwikala kaaba aka diloolo edi, ne bwa kukwacila Mukalenge mudimu.

⁴ Nenku pâmvwà ngakula bwa Mwaneetu Neville, ne bwa diyiiisha dya dituku adi, mwikale ngambila inàbànà mutekete ewu, mwaneetu wa bakaji wafumu ku dishiyangana neetu ewu. Úvwa, twètù bônso tudi bamanye ne ùvwa nganyi mwine awu, ùvwa m’Mwaneetu wa bakaji Weaver. Nenku mvwa ngeela meeji bwa muntu mulume kampanda kaaba aka, udi mubatiijibwe diloolo edi; yèyè mukaji ewu... Ngâkamubàtiiza mu ciina cya mâyi eci pâmvwà... byakakengela kulwabo nende apa mu dikalu dya balema. Úvwa ùpunga ne lufu, ne kansere, wa bwalu ùvwa anu ne diloolo adi bwa kwikalaye ne mwoyi; bangangabuka bakaavwa beela byanza muulu bwa bwalu bwenda, ùvwa ne cya kufwa dinda dya pavwabu bucya. Ke mêmè kubwela mu nzubu mwende ne kuteeta kuyiikilangana nende pa bidi bitangila dyondopiibwa dya kudi Nzambi, ke kwikalaye anu wambulula ne: “Ncyèna mwakanyine bwa wêwè kubwela mu nzubu mwanyi to.” Yêyè kwamba ne: “Ncyèna—ncyèna mwakanyine bwa mwambi kusanganyiibwaye mu nzubu mwanyi to.” Yèyè ne: “Ndi ngènzàmpèkààtù.” Kadi kwambaye ne: “Mukalenge, ncyèna muswe bwa mfwe anu mushindu ewu

to.” Ke pa nanku Grace Weber, udi kaaba aka ewu, kuyaye naanyi kwine aku. Ncivwa anu mvwilaku, mucyoke ne dyenza dya masangisha; nenku kwôkò aku, pâmvwà mmusambidila apu, e kumubadila Mufundu, ke kusungidiibwaye. Pashiishe, ùvwa mwa kwambulula diboko dyende anu ne lutatu, kadi kujingaye bwa kulabula muntu ne muntu ku cyanza. Ùvwa anu. . . civwa ncintu kampanda civwa cimwenzেকে.

⁵ Nenku pavwabo balabulangana ku cyanza apu, mêmè kumumona mu cikeena-kumona wenda uya ku lupangu lwa nzoolo, ne walukila. Mêmè kwamba ne: “Eyo, nebikumbane mpindyewu ewu”; ne ciine aci kukaadi bidimu dikumi ne mwandamukulu. Nenku yêyè wakashiya kansere aku paanyima, kubangila anu kwine kwônso aku. Mwăfùyì emu. . . Kî nne mmufwe bwa kansere kampanda to, mmupete diimana dya mwoyi didi dimushipe. Bavwa bamuteeke ku mbombone; mmufwe diimana dya mwoyi.

⁶ Nenku pashiishe mvwa ngeela meeji, anu kundekeelu mene pavwa bantu benda bapatuka apu, biikale bimba ne: *Ke Yesù Kulwayè*. Ke civwa cyenzeke menemene ncyôci aci, Yêyè nguvwa mulwe ne mulame mwoyi wende munda mwa bidimu abi dikumi ne mwandamukulu. Ke mêmè kudyambidila ne: “Mushindu mwine udibi bikumbanangane’s we.” Pâmwăpa mukaji awu kavwa nansha mumanye ne uvwa ucyenza mushindu awu to. Pashiishe, kabidi, bivwa bifwanyine kwenzeka ne ikale mucimanye. Kadi anu mushindu mwine uvwabi bikumbanangane bwa kwikala ne katupa aku ne: *Ke Yesù Kulwayè*.

⁷ Mpindyewu nkumpala ndambu, mûndi—mûndi ntekemena, kwa mulongolongo wa masangisha aanyi. Ntu nshaala mutu unnyunguluka bibi be. Mu dinda emu, mvwa mubinduluke bikole bya menemene, mu mushindu wa ne mêmè kuya bwa—bwa kasambila. Nenku ndi—ndi kwanyi kumbelu, mwalukile muneemu. Famiye wanyi, ndi mfuma ku diya kabashiya mu Arizona, nenku ndi. . . nenku bwa bânà kupinganabo mu kalaasa. Ne mêmè ndi mwalukile muneemu bwa—bwa kwikishaku, kuya katwa buluwà ne Mwaneetu Wood ne musumba wa bânà beetu baa balume baa mwaba ewu; bwa kuya katwa buluwà, mu lumingu lulwalwa elu. Netuye mu Kentucky. Nenku mvwa. . . mvwa mu. . . Mbyenzeke ne ndwe dituku divwa—divwa Mandamu Weaver mufwe, nenku bidi anu bwa ne mpete mushindu wa kwikala apa ne kukwacishaku Mwaneetu Neville ku dyenza dya madilu awu.

⁸ Nenku ncyêna nteeta bwa. . . ncyêna nteeta bwa—bwa kwamba bipitepите bûngî pa bwalu abu to, nudi bamanye’s, mwaba udi bantu biikale badidilakeena. Bwalu, ndi ngeela meeji ne, cimwe cya ku bintu bidi bitambe kwikala bya bibi menemene nkumona mu—muntu mulume anyi muntu mukaji udi anu udidilakeena ku musangu ne ku musangu. Ntu misangu

yônsò anu ndyambidila ne: “Nzambi, undameku ku cyôci aci.” Nudi numona’s, aci—aci cidi citekesha diitabuuja dîbà dyônsò, nudi bamanye’s. Udi anu—udi anu...wêwè mwikale—wêwè mwikale... Ndi mumanye ne padibo benda bakola, muntu ne muntu wa kutudi, netupete anu cintu kampanda cyenzeka ne cintu kansanga cyenzeka. Ne ndi mumanye ne tuntu tukese atu netwikale twenda twambakanangana, mpaudi wenda ukola apu, bidi anu ne cya kwenzeka. Kadi mêmè ndi ngeela meeji ne cimwe cya ku bintu bidi bitambe kwikala bya bibi menemene, mpadi Sataana ne cya kwoya nsòmbelu wa muntu kampanda: muntu mulume mukulakaji anyi muntu mukaji mukulakaji wa udyabakeena, nudi numona’s. Ndi—ndi ntekemena ne ncyakufika pa kaaba kaa nanku to. Ndi ntekemena ne ndi mwa kubitwala, majitu aanyi, ne—ne kufika pa kaaba kaa ne... Ndi muswe bwa nsòmbelu wanyi ikale mwoyiibwe ne Butumbi bwa Nzambi: mwoyi mule Wende, kalolo, ditalala, bupole, ne muujiibwe tente ne Nyuma Mwîmpè.

⁹ Nunku ndi...cimwe cya ku bintu bitu misangu yônsò bintapetape ku mwoyi mu nsòmbelu wanyi mujima, citu ndisaama dya mutu munyunguluke. Mbwena kwamba ne pândî nshaala mucyoke menemene, pa dîbà adi nshaala muzengele zèngèlèè. Ndi nshaala...mu mushindu wa udyumvwa anu bu ne muntu nansha umwe kêna ukucyukaku to, nudi bamanye’s, ne—ne nwênù bônso nudi...Nudi naaci, nansha nwênù. Kadi bidi bingenzekela mêmè ne ngikale naabi mu cipimu cipicidile, nudi bamanye’s, ne bitu bilwa bibi be misangu mikwabo, nenku binkolela bwa...Cidi ndibinduluka, ne ke cidi cyenza nanku. Ne pa dîbà adi ntu nkafika mu mushindu wa ne misangu yâbûngî, nangananga ne bikeena-kumona bûngî cyanaana abi, nudi numona’s, bidi binkwata anu nanku. Ntangila muntu nunku ewu, ndyambidila ne: “Eci ncikeena-kumona. To, to, to, kî ncyôci to. Eyowa’s! Kî ncyôci anyi?” Nudi numona anyi? Kanwena mwa kufika ku dyumvwa ne mmushinga kaayi udi ku cyôci aci to. Ke pa nanku—ke pa nanku wêwè—wêwè kubanga kudikonka. Pashiishe ubanga kwela meeji ne: “Ee, udi...” Pashiishe udikokela ku luseke wamba ne: “Ee, mpindyewu, ncinyi—ncinyi cînkaadiku mwenze? Ke mêmè ewu, nkaadi—nkaadi ne bidimu makumi ataanu kadi nciyi ne cînkaadiku mwenze bwa Mukalenge; kadi nyewu—nyewu ngenda nkulakaja. Nunku ncinyi...? Kaa, ekelekele.” Pashiishe wangata anu... citûtù tubiikila ne “kabungame” aci. Bamwe baa kunudi nwênù bânà baa balume baa bukole bwanyi ebu mbavuluke civwabo babiikila ne “kwikala kabungame.” Papa uvwa anu ne ciibidilu cya kucyamba kadi mvwa anu ndikonka ne uvwa uswa kwamba cinyi, kadi ncyà bushuwa ne bwa mpindyewu nkaadi mumanye civwaye muswe kwamba. Pa nanku, udi ubanga kudyumvwa mu mushindu awu, paaku kakuyi bwalu bwa ndolò mu ciine aci to; ùdi anu ng’wêwè, udi mucimanye. Nwamonu’s, udi mucimanye, wêwè ngudi wenza cyôci aci.

¹⁰ Pa nanku mwya nteeta bwa kuditùùjakù ndambu mpindyewu, bwa kudilongolola ku disakiibwa dinene dîndi ntekemena ne dilwalwa kataataka ewu. Ne pashiishe ku... Bidi bikengela bwa nye ku New York mpindyewu kakuyiku dijanguluka to, nenku ndi...ku disangisha kampanda kwine aku, ku kampanye. Ke pashiishe mpweke nye ku Shreveport, pashiishe ngalukile ku Phoenix. Ke pashiishe ndwile lwà ku wesete eku...ku mwelelu wa ku sud kwa États-Unis. Ne pashiishe badi munkaci mwa kulongolola bwa lwendu lwa kuya dyamwamwa dya mbû mpindyewu, bwa kubanga patudi anu ne twâpeci mushindu paanyima paa mbangilu wa cidimu, pâmwâpa mu ngondo mwisâtù, ngondo mwinâyì, cintu bu nanku awu; kunudi nubangila ku Stockholm anyi ku Oslo, ne kuya mu nyungulukilu wa buloba bujima, bu twêtù mwa kwikala ne mushindu mu lwendu lwa dinyunguluka lûlwalwà elu.

¹¹ Kadi bwa mpindyewu ndiku kwanyi kumbelu, bwa kwikishaku ndambu, bwa kwanji kwalukilaku mu mêmè ne kudipetululaku. Ne bu Mukalenge mwa kwanyisha, nêngàlukilè dyalumingu dilwalwa, mfumina ku Kentucky. Nenku—nenku piikalabi ne mbikumbane, biikale bisankisha Mukalenge, ne Mwaneetu Neville yèyè kayi umvwa bimutacisha to; ee, nênteetè anu bwa kwenza disangisha mu dyalumingu dilwalwa edi, bu—bu Mukalenge mwa kwanyisha. Nenku bu Yèyè mwa kwanyisha anu menemene mudi Mwaneetu Neville wanyisha pende amu, mêmè—mêmè nêngikalè mwaba ewu. Eyowa's, mukalenge, Yèyè udi anu bu mudi...bu Yèyè mwa kucyanyisha bu Mwaneetu Neville. Ndi ne ditekemena dya ne Yèyè neanyishe. Mpindyewu, nwamonu's, pa nanku ndi mumanye ne abidi adi panshi aa, bu Mukalenge mwa kwanyisha, nêngikalè mwa kushiyangana neenu bwa cikondo kampanda.

¹² Nenku ndi...anu tuumayiisha tukese cyanaana, bu mûndi mwa kwangataku kantu kampanda kàdì pa mwoyi wanyi, pa dîbà adi ndi—ndi—ndi ndyumvwa ne dijinga dya kunwambila kiine kantu aku, nudi numona's, nenku tudi mwa kwenzelaku bwobumwe kwôkô aku. Mpindyewu, ndi naatu anu ndambu, tutaanu anyi tusambombo tudi tumvwile mu matuku makeke adi mashaale aa. Nenku mwya muye, matuku abidi aa, mukatwe buluwà bwa nshindi kuntweku. Nenku ndi mbwela mu diitu, nyamu ne crayon ne mabeji. Nwamonu anyi? Mpindyewu pakaadibi dîbà dya kwîsù kutooke bîmpè, ndi nsômba mweyemene ku mucu mwaba kampanda. Mêmè nciyi mulaale to, ndi nditwa mu disambila, ne pashiishe mêmè, Mukalenge muswe kumpa cintu kampanda, ndi mbanga kufunda tuntu tukese pa cine aci, nudi numona's. Nudi bamanye cîndi muswe kwamba's; paudi paa nkaayeebe, ne pashiishe wêwè... Pashiishe ke mêmè udi ubwela ewu, mbifunda byônsò abi pa kâlùpè. Nenku pashiishe pakaadibo bambiikila, ndi mpatuka lubilu ngangata kâlùpè kaanyi aku ne nya ntapamu dîsù bwa

mmone cîndi mwa kubanga naaci, nudi numona's. Ke cidi cyenzeke patudi twakulangana neenu apa ncyôci aci.

¹³ Nenuku mpindyewu, ndi muswe, bu Mukalenge mwa kwanyisha, kwakula anu...Ndi nteeta bwa kwenza... kukosolola mayiisha a manene, maleemale awu, nudi numona's; a bwena adi anwangata mêbà ne mêbà awu. Kadi Mukalenge mmunkwacisheku bwa kwipidija mu Chicago, diloolo dya ndekeelu kuntwaku, tusunsa tutwe ku makumi asatu. Ke muntu mukwabo kulwaye mwaba awu, kwamba ne: "Ncivwa mwele meeji ne aci civwa mu wêwê to, kadi wacikumbaji's!" Nenuku tusunsa makumi asatu, pamutu paa mêbà matwe ku abidi ne citupa, anyi asatu, nudi bamanye's. Nenuku pàmwăpa ndi mwa kulwijakaja diloolo edi ne kudiibidijaku ndambu, bwa kubenga kunulama ntanta mupitepite bule.

¹⁴ Nzambi anubeneshe. Kwônsò kûngààyà aku, kakwakwikalaku mwaba bu tabernacle ewu to. Apa nkwanyi kumbelu, kumbelu kulenga be. Kadi ndi mu cinyongopelu pamwe ne famiye wa ba-Weaver. Kabidi ne mwaneetu wa balume wa bafiike udi kufwe ewu, mvwa wa ngiikadilu mulenga wa kacya. Nenuku yêyê ukaadi Kwetu kumbelu pamwe ne Nzambi mpindyewu, ne kwajiki. Ne nebikengele bwa nwênù kuya nansha bishi, ne tudi bônsò bamanye aci. Pa nanku tudi...Mukalenge asweku ikishishe misuuka yabo mu ditalala, ne dîngà dituku tudi tutekemena ne netukatuutakeene mu Buloba bwa dyamwamwa, mudi kamuyi nî mmasaama, nî ntuninganyinga, nansha lufu. Patwamba kufikila kwine aku, twênzàâyî anu byônsò bitudi mwa kwenza abi bwa Evanjeeliyo.

¹⁵ Patudi twakula bwa dibinduluka apa, ke cîmvwà nsambidila mu dinda emu. Cyûdi mufwanyine kwenza ncinyi bu wêwê kuyi ne dibinduluka? Anji elaaibi meeji pa bwalu abu. Dibinduluka nцитupa cya mwoyi wa panu. Aci civwa cinkolesheku ku mwoyi pângătùmukù meeji. Bu ne kuvwa ne dibinduluka, uvwa mufwanyine kwikala anu bu mwânà wa biteetela, uvwa mufwanyine kwikala kuyi uumvwa njiyà to. Nkufwanyine kupangika cintu cya wêwê kukwacilapu mudimu. Bu mudi mulume ne mukajende, pàmwăpa padi mukaji muswe kwenza cintu kampanda, nenuku bôbò biikale bateeta kukwacila mudimu pamwe (nangananga beena Kilisto), kadi mukwabo yêyê muswe...Nenuku pashiishe panudi nudisanga bwa...wêwê ujangula cidi mukaji mwenze; ne yêyê mukaji pende ujangula ne...Nudi numona's, ncya bushuwa ne dibinduluka didi ditamba kunuseemeja pamwe. Ne muntu ukwambila ne: "Ee," ne, "ela anu meeji bwa mukajaana awu uvwa mu dibinduluka dyâbûngî pauvwa kuyi bîmpè menemene apu," anyi "mulume uvwa mu dibinduluka pauvwa kuyi bîmpè menemene apu. Pashiishe padi byônsò abi bifwidiibwa luse, tangila umone

mûvwà mudyûmvwè bwende yèyè. Ekelekele, udi anu . . .” Udi umona’s, bikengela wikaleku ne dibinduluka. Ke cyônsò cidiku.

¹⁶ Nenku anji elaayibi meeji, bwa njiyà, amba tũng bu ne kuvwaku ne njiyà nansha mikese, kuyi uumvwaku bisaama anyi cikampanda to? Ambabi tũng bu ne kakuvwaku bisaama nansha bikese? Kuvwa mufwanyineku kuumvwa njiyà nansha mikese to. Nwamonu anyi? Nenku bu ne kuvwaku ne njiyà to, nunku cimwe cya ku byumvwilu byebe ncifwanyine kwikala ciye. Nwamonu anyi? Pa nanku, nwamonu’s, byônsò bidi anu bîmpè nansha bishi. Pa nanku: “Nzambi, watûpakù anu ngàsà bwa kuciimanyina,” ke cintu ncyôci aci. Bu twètù anu mwa kwimana kuulu ne ngàsà awu, ne kwimana mwaba awu kwamba ne: “Tudi bamanye ne paajika mwoyi wa panu ewu, ùdi wà munene udi usanganyiibwa luseke lukwabo kutudi bindile bwa kuya.” Nenku mpindyewu, tudi—tudi tuvuluka ne bintu byônsò ebi, bidi anu ndibinduluka.

¹⁷ Aci, bamwe bantu badi bateeta kwambilangana bwa bwena Kilisto ne, “nudi badishikamine ku dilubakaja dya meeji. Nudi . . .” To, kî nnanku to. “Nudi badishikamine ku dibinduluka.” Kaa, to! Udi usakidila dibinduluka paudi ushaala mwena Kilisto, bwalu uvwa mu mushindu kampanda wa mwena màmfû, kàcyûki myanda, cyônsò civwaku aci, kuyi ucyuka byûvwà wenze to.

¹⁸ Kadi paudi ushaala mwena Kilisto mulelela, dîbà dyônsò udi anu udikonka ne: “Mémè ewu ndiku nsankisha Mukalenge wanyi anyi? Bu mémè mwa kuumvwaku dîyì dya kudiYe’s!” Cidi cikushiya mu dibinduluka, cikushiya mutape ntaala. Cyôci aci ke cidi cikwenza cyûdi aci. Pa nanku paanyima paa byônsò, dibinduluka ndibenesha. Mbilondeshile anu ku mushindu wûdi ucitangila awu. Mbilondeshile anu ku mushindu wûdi ucitangila awu. Nwamonu anyi? Bu wêwè anu mwa kutangila luseke lukwabo, kùdi—kùdi . . .Nansha bu wêwè mwa kupandulula cintu kampanda tupese tukese tukese mushindu kaayi, wêwè udi anu ne nseke ibidi ya cyôci aci, nwamonu’s. Pa nanku udi muswe kumona nseke yônsò ibidi.

¹⁹ Pa nanku dibinduluka . . .Ntu ndyambidila ne: “Kaa, ekelekele, cidi . . .Dibinduluka edi ke cinyi’s? Ngîkalakù mulediibwe nciyi ne dibinduluka edi’s we.” Ee, bu ne ncivwaku ne dibinduluka edi to, nunku ncyèna cîndi eci to. Nunku ncyèna mwena Kilisto to, pàmwăpa. Dibinduluka edi ndidi dintume kudi Yesu Kilisto. Nwamonu anyi? Pa nanku, ditu ncintu cya dibenesha bwanyi mémè.

²⁰ Nenku anu mwakamba Pôlò, byenze bu ne ùvwa ne dibinduluka anyi ne cintu kampanda cikwabo, kukonkaye Mukalenge misangu isatu bwa—bwa kuumumushaci. Ke Mukalenge kwamba ne: “Shawula, Wanyi . . .Pôlò, ngàsà Wanyi mmukumbane.”

21 Yèyè kwamba ne: “Nenku, nënditùmbishilè mu mateketa aanyi. Nenku pàndi ne butekete, ndi ne dikanda.” Nwamonu anyi? Bu mudibi anu ne ndiswa dya Nzambi, mbîmpè.

22 Mpindyewu, ngâkaMukonka musangu kampanda pavwaci cintacisha bikole, cinkwacisha bwôwà. Ke Yèyè kungambila, kukaadi bidimu bitwe ku mwandamukulu anyi ku dikumi, Yèyè kwamba ne: “Kacyakukukwacishaku kabidi bwôwà to.” Ne cyôci ciine kacitu cinkwacisheku kabidi bwôwà to. To, mukalenge; ncitu—ncitu nditacishaku kabidi bwa cyôci aci to. Ntu anu ncyumvwa cyanaana, kadi ndi mumanye ne cidiku; kadi ndi anu nya mutangile kumpala bwalu kacicyena cinkwacisha kabidi bwôwà to, ndi ne kusakidila kwàbûngi bwa bwalu abu.

Mpindyewu, Yèyè's uvwa mufwanyine kwikala mwambe ne: “Kacyakwikalaku kabidi to,” anu bya mwomumwe ne: “Kwakukwacika kabidi bwôwà to.”

23 Pa nanku nku diswa Dyende kùdici cyenzeka, pa nanku mêmè ndi anu ncyupukila ngamba ne: “Twasakidila, Mukalenge, nêngëndè mushindu awu.”

24 Mpindyewu, twinyikaayi mitu yetu bwa katanci kakese bwa—bwa disambila. Kudiku dilomba dya pabwadi bwa disambila anyi? (Nyewu mmona mishwala miteeka mwaba ewu.) Ela cyanza cyebe muulu. Mukalenge, wabeneshaku umwe ne umwe wa ku bâna Beebe.

25 Taatu wetu wa mu Dyulu, patudi tuseemena mpindyewu ku Nkwasa Webe munene wa ngàsà apa, mbwalu tudi balombiibwe bwa kulwaku. Tudi tulwa bilondeshile dîyì dituma dya Yesu Kilisto. Nenku tudi tulwa ne ntatu yetu yônsò, ne tuyuupwila pambidi Pende bwalu Yèyè ngudi utucyuka. Mbusambi bunenepu kaayi, bwa kumanya ne Yèyè udi utucyuka. Nzambi munene wa mu Dyulu, Mufuki, mwikale utucyuka, twètù bufuki Bwende. Tudi ne disanka dîngi bwa bwalu abu, Mukalenge. Mbusambi kaayi mu bikondo bitudi ne mwoyi ebi, mudibi bimweka bipeepele bwa—bwa kusuna busambi kakuyi ku cîngà cintu to anu ku Dîyì Dyebe. Ke bwetu busambi mbwôbò abu, m'Mulayi Webe. Ne mu Mulayi Webe awu, Wèwè wâkamba bwa twètù kwikala tumanyisha malomba etu, ne: “Nwènù balombe cintu kana cyônsò mu Dinà Dyanyi, Mémè nêncyênzè.” Ne Milayi yônsò minene eyi ya ne: “Lombaayi nenupete. Ambilaayi mukuna ewu ne: ‘Tentemuka,’ ne kanuyi nwela mpatà to, ne newutentemuke,” Milayi yônsò eyi, ne twètù tudi mwa kusuna mu Cyôci aci anu bitudi tulomba abi.

26 Byanza mbyebi byela muulu, badi bajinga cintu kampanda, Mukalenge. Wèwè ngudi mumanye dijinga dyabo; dikùmbàjàku, Taatu. Nyewu nteeka dyanyi paanyi disambila pamwe ne aabo bôbò kumpala Kwebe, cyanyi cyanza cyela muulu pamwe ne byabo. Monaaku ne pa cyambilu apa, nyewu padi mishwala miteekapu. Kaa, mushindu mwine udi bantu ne diitabuujá,

diitabuujja dya bukitu, Mukalenge. . . Mbimweneke bu ne cidi anu cintu kampanda kûdî Wêwê mumbeneshile, bwa kwikala mukumbane bwa kusambidila babeedi. Nansha penyi pônsò, nansha mwaba kaayi, kwônsò kûnyaayà, ncintu kampanda bwa kusambidila babeedi. Nzambi, filaku dikwacisha mpindyewu. Ndi ndomba ne meeji matooke ne Wêwê ukumbajeku malomba a mishwala idi miteekiibwe kaaba aka eyi, bwa bantu badi balombe. Enzaku ne luse Lwebe lwikale pambidi paabo.

²⁷ Mukalenge, tudi tuumvwa bamba ne Mwaneetu wa bakaji Hicks udi ne muntu mukaji kampanda mwaba ewu, udi mwenze lwendu lule lwa mu ndeke ufumina mwaba kampanda mulwe kaaba aka bwa kumusambidila, mwikale ne kansere; ne uvwa ukeba bwa kumanya ni uvwa mwa kupeta mushindu wa kumufikisha kaaba aka. Nyewu ndomba, Nzambi, bwa Wêwê kulama mwoyi wa muntu mwine awu; enzaku nanku. Mwânà wa balume mutekete wa mwakunyaanyi, Mikie, mulaadika kwaka mwikale ùlùka, mwikale ne mubidi luuya mukole, nyewu wáfùmu ku dyumuka mu mushiku wa mbelu emu. Mukalenge, ndi—ndi mwitabuuje ne tukaavwaku benze disambila dya diitabuujja mwaba awu ne Wêwê ukaadi mumane kuwimanyika, ne mêmè—mêmè—mêmè ndi ne kusakidila kûdî Wêwê, bwa pângûmvù mubidi luuya awu ushiila mwânà wa balume awu mwaba kumpala kwa mêmè kuumuka mu cibambalu.

²⁸ Mpindyewu, Mukalenge. . . nenku ndi nKusakidila bwa maalu miine ônsò aa. Mpindyewu bwalu bwâns hàadidi mêmè bwa kwakula pa Dîyì Dyebe. Tupeeshaaku Dîyì Dyebe, Mukalenge. “Dîyì Dyebe m’Bulelela.” Ubeneshe misuuka yetu ne utupe ngàsà udi utukengela, bwa twamona mwa kumusuna mu Milayi ya Nzambi diloolo edi, mu Dîyì, bwa kutudiisha mu citupa cya lumingu cyônsò cidi cishaale eci; enzaku nanku. Benesha mpaasata wetu, musuuka wa bukitu ewu, mukajende, bânà bende, balami, balubuludi, ne muntu yônsò udi ubwela anyi udi upatuka mu citanda emu; enzaku nanku, Taatu. Mu Dînà dya Yesu Kilisto mmutudi tulomba mabenesha aa. Amen.

²⁹ Mpindyewu, ndi muswe kubala mu myaba ibidi ya mifundu ya Mukalenge. Ndi njinga kubala dyambedi mu Mukanda wa Misambu, Musambu wa 86. Ne pashiishe ndi muswe kubala mu Maataayi Munsantu, nshapita wa 16, 1 too ne ku 3. Nenku ndi muswe kubala citupa cya mwine Musambu ewu, kawuyi wônsò mujima to kadi kubangila lwa ku mvensa wa 11, cidi cipite kakese cyabibidi cimwe cyawu.

³⁰ Nenku ndi njinga kumanyisha eci, piikalabi ne ndi ncibiikila ne ncyena—bwalu, kumpala kwa mêmè kwakulapu: *Cikondo Nè Cimanyinu Cyà Didisanga*. “Cimanyinu cya cikondo cya didisanga,” aci cidi cimweka cyenze bu cikodyakanangane. *Cikondo* (Nwamonu anyi?) *Didisanga*, cikondo cya didisanga, ke cidiku mpindyewu eci. Ne *Cimanyinu* cya cikondo cya didisanga aci.

31 Mu—mu Musambu awu, disambila dya Davidi, Musambu wa 86.

Inyika dici dyebe, Éyì MUKALENGE, unteeleje, bwalu ndi mukengeledi wa bintu.

Lamaku musuuka wanyi, bwalu ndi wa cijila; Éyì wêwê Nzambi wanyi, sungilaku musadidi webe udi mukweyemene wêwê.

Ikalaku naanyi luse, Éyì Mukalenge, bwalu ntu ngeela mbila kûdi ku dituku ne ku dituku.

Sankishaku musuuka wa musadidi webe, bwalu kûdi wêwê, Éyì Mukalenge, nkûndi mbandisha musuuka wanyi.

Bwalu wêwê, Mukalenge, udi mwîmpè, ne lukasa lwa kufwilangana luse, ne mûle tente ne luse lujaalame kudi bônso badi bakusoka.

Teyaaku dici, Éyì MUKALENGE, ku disambila dyanyi; . . . teyaaku ntema ku dîyì dya mitendakeenu yanyi.

Mu dituku dya lutatu lwanyi nênkusòkè wêwê, bwalu wêwê neungandamune.

Kaa, aci kî ncilenga cya menemene anyi? “Wêwê neungandamune.”

Munkaci mwa tunzambi kamwena nansha kamwe bu wêwê to, Éyì Mukalenge, anyi mene kamwenaku byenzedi bya difwanyikija ne cyebe cyenzedi to.

Matunga ônsò audi wêwê mwenze nealwe kukuukwila kumpala kwebe wêwê, Éyì Mukalenge; wêwê neutumbishe dînà dyebe.

Bwalu wêwê udi munene, ne udi wenza bintu bya bikemeshangana: wêwê udi Nzambi nkaayeebe.

Teelejaayaaku mpindyewu:

Ndongesheku njila webe wêwê, Éyì MUKALENGE; mêmè—mêmè nêngèndelè mu bulelela bwebe: sangisha mwoyi wanyi ku diciina dya dînà dyebe (Bwobumwe! Nwamonu anyi?) . . . sangisha mwoyi wanyi ku diciina dya dînà dyebe.

32 Ndi mpindyewu ngakula pa didisanga ne cimanyinu cya cikondo. Mpindyewu, mu nshapita wa 16 wa Maataayi Munsantu:

Bafaalesa kabidi pamwe ne Basadoka baakalwa, . . . bwa kumuteeta yêyè, bajinga bwa yêyè kubaleeja cimanyinu cya mu dyulu.

Ne Yêyè wakandamuna e kubambila ne: Patu diloolo dilooloka, nwênù nutu nwamba ne, Mêmè . . . Kuulu nekwikale kwîmpè, bwalu dyulu ndikunze.

*Ne mu dinda ne: Kuulu nekwikale kubwite bikole . . .
kuulu kubi be leelu ewu, bwalu dyulu ndikunze
ne dibwite. Éyì nwênù beena lubombo, nudi mwa
kujingulula mudi mmwenekelu wa dyulu, kadi kanuyi
mwa kujingulula bimanyinu bya cikondo?*

Mukalenge asakidileku mabenesha Ende a ngàsà ku dibala dya Dìyi edi.

³³ Mpindyewu, tudi twakula bwa didisanga edi, cikondo cya didisanga; cimanyinu cya cikondo cya didisanga. Nwamonu's, Yesu uvwa mwaba ewu, mu dibala dya Mufundu wa ndekeelu ewu, Yèyè uvwa munkaci mwa kutandisha balombodi baa ntendeleelu bwa muvwabo kabayi bamanye mwa kujingulula cikondo anyi cimanyinu cya cikondo. Mpindyewu, aci citu misangu yònsò anu cintu cinene bwa bantu, nwamonu's, bwa kwikala bakumbane mwa kujingulula *cimanyinu cya cikondo cinudi ne mwoyi*; bwalu Nzambi udi ucifunda bitooke tòò mu mushindu wa muntu kayi mufwanyine kucyepela to.

³⁴ Mpindyewu, pa ciibidilu, ndi mufwanyine kwalukila cyanyima ne kwangataku tuntu kampanda kudi bambi bakwabo, basadidi bakwabo baa Mukalenge baa mu cikondo cya Bible (bu mudi cimanyinu cya mu cikondo cya Noa, cimanyinu cya mu cikondo cya Danye ne—ne bakwabo, bimanyinu bishiileshiilangane), kadi ndi muswe kucicinguluka diloolo edi bwa—bwa kulaminyina dîbà, bwa kumona mwa . . . Kadi citu misangu yònsò anu ngenzelu wa Nzambi, bwa kubapa ci—cimanyinu cya cikondo cya mu bufuki, bwa muntu ne muntu kumanyaye anu ne ndîbà kaayi divwaye. Nenku bivwa bikengela bwa Bafaalesa aba kwikalabo bamanye cikondo cyabo. Bivwa bikengela kwikalabo bamanye cikondo aci ne civwa ncikondo kaayi. Mu mwaba mukwabo Yèyè wakamba ne: “Bu nwênù baMmanyè Mémè, nunku nudi bamanye dituku Dyanyi.” Nwamonu anyi? Cidi—cidi cinene, ci—cinene be bwa twètù kuumvwa. Nwamonu's: “Kabayi ne luumvu to!”

³⁵ Ke civwabo misangu yònsò bamba bwa baprofeta, bavwa bamba ne: “Ne yèyè uvwa ne luumvu, ku bikeena-kumona bya kudi Mukalenge. Ne Dìyi dya Mukalenge divwa dilwa kudi ba—baprofeta baa kale.” Nwamonu's, bavwa bapetela luumvu ku Dìyi dya Mukalenge, ku baprofeta. Nenku pashiishe, baprofeta bavwa bafila cimanyinu. Bu mudi, muntu kampanda wakalaala luseke lumwe munda mwa cikondo kampanda, pashiishe yèyè kukudimuka e kulaala luseke lukwabo. Muntu mukwabo yèyè byakakengela bwa kuvuulaye bilàmbà. Nenku kaa, kudi bintu bûngì cyakaa byakenzabo bwa kuleeja ne mmu cimanyinu kaayi muvwabo ne mwoyi. Nenku mpindyewu tudi bamanye ne Nzambi wâkenza mauulu ne buloba, ne—ne wâkaadija mudimu Wende bwa Wamona mwa kuumvwija cikondo Cyende ku cimanyinu awu, Nzambi umwèumwè awu udi ne mwoyi leelu ewu. Pa nanku tudi ne cya kwikala, cintu kampanda . . . Bu

mutudi tumona ci—cikondo citudi ne mwoyi, kudi ne cya kwikala cintu kampanda cidi muntu kampanda mwikale upanga kumona, mwaba kampanda. Nwamonu anyi? Bwalu Nzambi kî mmufwanyineku kulekela bintu ebi byenzeka kayi utupa cimanyinu cishindame to, mu mushindu wa ne, twamona mwa kuumvwa.

³⁶ Mpindyewu bwalu mbwôbò ebu leelu ewu, mbwa ne balombodi baa ntendeleelu, katwena tucibala mu mushindu mujaalame to. Bidi anu mwakadibi mwine musangu awu, kabavwa beela meeji ne cikondo cikaavwa cilwe to. Bôbò—bôbò bavwa badeyela meeji ne bavwa mu nsòmbelu wa ditalala dya menemene piine apu, ne pa nanku kabavwa bindile Maasiya kampanda to. Ne Yesu pende mmwambe ne Dilwa Dyende nediikale “bu mudi mwîvi bufuku,” piikala—piikala bantu kabayi bamanye cidi citangila Dilwa Dyende. Kadi kuvwa bamwe baa ku baavirgo baàkayà bwa kutuutakeena Nende, cyabibidi cimwe cya bôbò abu, bavwa ne maanyi mu myêndù yabo ne bavwa badilongolole; bavwa bindile cimanyinu aci. Nenu bôbò abu ke bândi ngambila diloolo edi, nwamonu’s, ngambila aba badi munkaci mwa kwindila cimanyinu mpindyewu, cimanyinu cya Dilwa Dyende.

³⁷ Bimanyinu ebi, bifidiibwe kudi Mukalenge, mbifidiibwe anu kudi beena kwitabuuja nkaayaabo. Beena bupidya bôbò kabatu babimonakweee. Badi anu babisambuka, ne kabayi babimona to. Nenu mpindyewu, anu mudibi bulelela ne Mwanjelo wa Nzambi mmufwanyine kwikala mwimane pa cibumba cya ku cyambilu eci diloolo edi, anu mudibi bulelela bu—bu mûndi munutangile elu, nenu ndi mufwanyine kwikala mucitangile; anyi nwênù bafwanyine kwikala bacitangile kadi mêmè nciyi mwa kucimona to, anyi mêmè mufwanyine kwikala mucitangile kadi nwênù kanuyi bafwanyine kucimona to. Mpindyewu, nudi bamanye ne aci ncyà mu Mifundu; m’Bulelela anu bwa menemene ebu. Bavwa bamona...Nudi bamanye ne Pôlò wakadishinda panshi, kadi bôbò...nansha umwe wa kudibo kavwa mwa kumona Bukênkè abu to.

³⁸ Bukênkè abu buvwa anu mwaba awu pavwa Yone mwimane mwaba awu kumpala kwa misumba ya bantu aku, ne binunu bya bantu ku mwelelu wa musulu aku, bya balombodi baa ntendeleelu ne—ne beena meeji, bantu banene. Ne Yone wakamba, yêyè mwine, ujaadika mwakamonaye Nyuma wa Nzambi upweka bu nyuunyi wa nkuci ne wikila pambidi Pende, ne Diyî dyamba ne: “Ewu ke Mwanaanyi munanga Mwena munda Mûndi musankile bwa kusòmbela.” Kadi muntu nansha umwe kaakaMumona to pa kuumusha Yone. Nwamonu anyi? Civwa anu bwende yêyè.

³⁹ Nukaavwaku bamone, muvwa cimanyinu cya beena meeji abu ciikale citooke tòò anyi? Baakatangila, kuvwa...Bavwa beena Ebelu. Bushuwa budi ne bôbò kabavwa balongi baa

mabulunga a muulu baa ba-Indiens to, bavwa beena Ebelu; bwalu bavwa baye kuntwaku mu ditunga adi bakalonge mabulunga a muulu, bwa kujikija dilonga dyabo dya kalaasa. Nenku pavwabo... kutangilabo lwa ku Yelusalema, ne bu muvwabi ne baakamona mitooto isatu ayi mifumine ku njila ne njila wabo—wabo wa cileledi, wa Ham, Sem, ne Yafete, wa ku cisa civwabo bafumine, njila ne njila yônsò, ke kumonabo mitooto ayi mu njila wabo wa cileledi. Aci civwa cimanyinu wabo bôbò, cya ne pavwa mitooto ayi mwa kusanganyiibwa myele mulongo, Maasiya uvwa pa buloba.

⁴⁰ Kaa, ekelekele! Kabivwa bikemesha mwakalwabo ne: “Yêyè awu udi penyi? Yêyè udi mulediibwe Mfumu wa beena Yuda awu udi penyi? Tudi bamone Mutooto Wende mu Esete, ne tudi balwe bwa kuMukuukwila. Yêyè awu udi penyi?” Bavwa bamanye ne Maasiya mwânà awu uvwa mulaadika mwaba kampanda, bwalu Nzambi uvwa mubape cimanyinu cya cikondo, cya ne Nzambi ne muntu bavwa munkaci mwa kudisanga. Mbwobumwe kaayi abu’s we, paakadisanga Nzambi Yêyè mwine mu mubidi wa buntu! Didisanga dya mushinga mutambe, ditambe bunene dya ku mishindu yônsò ya didisanga dikaadiku dyenjiibwe kacya, divwa mpaakadisanga Nzambi ne muntu; ne kushiya Wende—Wende ngiikadilu wa kwikala bu Nzambi ne kwalabaja ntenta Wende ne kubwejamu bukwabantu, ne kushaala umwe wabo, bwa kubapikula. Bwobumwe. Aci cyakenza cinyi? Cyakatwala ditalala pankaci paa Nzambi ne muntu bwa kashidi. Mushindu mwine utudi ne kusakidila’s we.

⁴¹ Nenku bimanyinu kabyakatumiibwa... Mpindyewu anji elaayibi meeji, muntu yônsò, ne balongi bônsò baa mabulunga a muulu; bantu mu miine matuku awu, yabo ntankù iwva mmitooto. Kuvwa nsentedi uvwa ubànda ku lusongo lwa—lwa kaleyi, nenku ubànda kuntwaku bwa kutangila. Ne yêyè uvwa umona pavwa mitooto kampanda isanganyiibwa mu kasumbu kaa mitooto, pavwayi ipita apu, uvwa umanya ne divwa ndîbà kaayi. Nudi nuvuluka mu Mifundu ne: “Tudi dîbà kaayi, nsentedi?” Ke nsentedi kwalukila e kumwambila ne ndîbà kampanda. Nwamonu’s, bavwa babadila dîbà ku mitooto.

⁴² Mpindyewu, kî mbwalu bwa dikema muvwa mitooto eyi miikale anu menemene mu mulongo bwa bantu basatu kadi muntu mukwabo nansha umwe kayi mwa kucimonaku anyi? Nwamonu anyi? Anu mu mulongo menemene. Mpindyewu, wêwè udi mwa kwikala mu mulongo mushindu awu ne Mufundu. Nwamonu anyi? Paakafika mitooto ayi mu bwobumwe, midisange mu kasumbu aka, bantu basatu bavwa paabo badisange musangu wôwò umweumwe awu. Ne wêwè udi mwa kwikala mudisange menemene ne Nzambi, mu Dîyì Dyende, mu mushindu wa bintu ebi bishaala bya bushuwa, ne udi mwa kubimona ne kumanya ne mbilelela. Nwamonu anyi? Cimanyinu

cya cikondo! Udi mufwanyine kutangidila anu lwa pamutu paaci, kwamba ne: “Kaa, macimbu’s we!”

⁴³ Kadi bwebe *wêwê* kî mmacimbu nansha. Bwebe *wêwê*, udi mudisange ne Diyi, ne ke Dyôdi edi. Pa dîbà adi kakuyi mpatà to m—m’*Bukênkê*, Mwaneetu Pat, paudi—paudi—paudi—paudi umona cimanyinu eci ciikale cidisanga ne mwena kwitabuuja. Nenku *yêyê* awu ngûndî ngambila *cyôci* eci ewu, mmwena kwitabuuja, bwalu mwena bupidya *kêna* *yêyê* ucimonaku to. Kadi nditandisha kaayi divwaci cifwanyine kwikalala bu ne *Yêyê* uvwa pa buloba leelu wa Ndaaya ewu, *kûdî* balombodi beetu *bââbûngî* baa ntendeleelu leelu ewu, badi kabayi mwa kubala cimanyinu eci to; bimanyinu bitudi tubala ku dituku ne ku dituku kaaba aka mu tabernacle emu, ne tumona bintu ebi. Ne bakwabo badi bacibala bamona mufundu ku cimanu, kadi nansha nanku bakwabo *bââbûngî* mbapange anu kucimanya, ne kabayi nansha bacimonaku to nansha kakese. Kudibo *bôbô* kacyenaku cintu nansha cimwe to; kabeena bacimona to.

⁴⁴ Mpindyewu monaayi ne, mu *cyôci* eci, *Yêyê*—*Yêyê* wakabafunkwina bimanyinu bya matunga. Mpindyewu, paakaMukonkabo pa bwalu ebu, bavwa bakeba bimanyinu; ke *Yêyê* kubapa bimanyinu bivwa *byênzekâ*. Kadi *bôbô* bavwa bakeba kumanya ne nshiikidilu wa buloba neikale *dîbà* kaayi, cimanyinu cya nshiikidilu neciikale cinyi. Ke *Yêyê* kubafunkwina myaba *yâbûngî* mu Mifundu pa bidi bitangila bimanyinu bya matunga, pa bidi bitangila cimanyinu cya mu *dyulu* mu maulu, ne cimanyinu cya pa buloba; *Yêyê* kubapa bimanyinu, cimanyinu, bimanyinu, anu cimanyinu ku musangu ne ku musangu. Kadi . . . *Yêyê* kubambila mu mwaba kampanda bwa cimanyinu cya matunga, Wakamba ne: “Panwamona matunga,” nwamonu’s, “abanga kudisangisha manyungulukile Yelusalema,” nwamonu’s, ke patudi tumanya ne cikondo cya lutatu lwabo cikaavwa pabwîpi, “panwamona Yelusalema bamunyungulukile kudi cilwilu.”

⁴⁵ Mpindyewu, kumpala kwa *bôbô* kumonabo mwa kwenza *cyôci* eci, Nzambi. . . Bivwa bikengela bwa baa pa buloba kudisangabo. Titus, kalaala kanene kaa masalaayi a beena Loomo aku kavwa ne cya kusangisha bilwilu byaku ne kulwa kubanyungulukilabo, paanyima paa beena Yuda aba bamane kubenga cimanyinu cya cikondo cibapeesha kudi Nzambi. Ke cikondo aci cyakalwa Titus kusangisha bilwilu byende, ne kulwa bwa kukwataye cimenga aci. Kumpala bivwa bikengela bwa kwikalaku didisanga dya cisamba cya Nzambi (cya mu mukana’s) bwa kulwisha *Dîyî* dya Nzambi, kumpala kwa ditunga kumonadi mwa kudisanga bwa kulwisha cisamba cya Nzambi. Nwamonu’s, bwobumwe, didisanga; didisanga pamwe.

⁴⁶ Ndi ngitabuuja ne tudi ne mwoyi mu cikondo cinene cya didisanga. Ndi munkaci mwa kufunda midilu mikunze eyi, ne bimanyinu bya bipodya ne bikwabo (bya bakaji, mushindu

udibo benza; ne balume, mushindu udibo benza; ne ekeleeziya, mushindu udiyi yenza), mwikale ndeeja kasumbu kakese aka, ne mwoyi wanyi wònsò ne, ndi ngitabuuja ne tudi munkaci mwa diditeeka mu mulongo wa Dìyì dya Nzambi mu dîbà dinene dya ciprofeta edi, kumpala menemene kwa Dilwa dya Mukalenge Yesu; biikale tudisanga ne tudilongolola.

⁴⁷ Mpindyewu, nudi numona, kumpala kwa Titus kusangaye matunga a... bilwilu byende, beena Izaleela baakadisanga ne baakadiswika, bwa ne kabiitabuuji ne Yesu uvwa Maasiya to. Bôbò kuMubenga, ne kuMwipata, ne kuMupoopela pa nkuruse. Ne pashiishe, paakabengabo lupandu luvwa lubâtùmina, ke kudisangabo bwa kucyenza. Mpindyewu, ikalaayi balame aci mu meeji: badisanga, bwa kubenga Mukenji wa dîbà! Bivwa bikengela kwenzabo ciine aci. Ne pashiishe paakenzabo cyôci aci, pa dîbà adi ke cimanyinu cya matunga kulwaci.

⁴⁸ Matunga kubangawu kudisanga, ke Titus kulwaye ne cilwilu cinene cya beena Loomo ne beena Ngelika eci ne bôbò kunyungulukila bimanu bya Yelusalema, kucincimikilabo bantu abu munda amu mpindyewu, ke kubangabo kufwa lwa nzala. Kudyabo bizubu bya mici. Josèphe, mufundi munene wa maalu malonda, ngudi utwambila ewu. Ke kudyabo bisoosa byakatuulabo mu buloba. Baakiipika too ne bânà baabo balela wa ewu ne wa ewu e kubadyabo; nwamonu's, bu mukaavwabo bapâle. Ne pashiishe, ndekeelu wa byònsò, Titus, uvwa yêyè musòmbèle mu tukuna mwamwa, mu nyungulukilu wa Yelusalema amu, nenku—nenku bantu bàvwà munda amu baakadyelela meeji ne bavwa benza diswa dya Nzambi, paakamonabo bilwilu ebi bibwela. Baakabenga kuteeleja Mulongeshi Munene awu, Mukalenge Yesu, ubambila cyôci aci.

⁴⁹ Kakuvwaku nansha umwe wa ku beena Kilisto abu wâkâkwâciibwamù to, bwalu bôbò baakamona cimanyinu e kuumukabo. Nwamonu anyi? Baakamba ne: “Badi ku mùsongà wa nzubu kabâkûtùluku to, anyi ewu udi mu budimi kaalukidi to, bwa kwangata cinkutu cyende; kadi nuyeeemenaayi mu Yudaaya, ne nusambilaayi bwa dinyeema dyenu kadiikadi mu muvù wa mashika anyi dituku dya Nsabatu to.” Bwalu, mu cikondo cya muvù wa mashika, tukuna ntufwanyine kwikala tûle tente ne nêjè; ne mu dituku dya Nsabatu, ciibi—biibi bivwa bikanga, ciibi cya cimenga, nenku bavwa bafwanyine kwikala bababucikile mu mushindu awu. Nwamonu anyi? Tudi baswe kufika ku cyôci aci abidi adi panshi aa pa bidi bitangila... mushindu udi Nzambi wenza biine bintu abi, bu Mukalenge mwa kwanyisha.

⁵⁰ Monaayi mpindyewu, Yêyè... Bavwa basambila bwa ne biikale... kabiikadi mushindu awu to, Yesu wakabambila bwa kusambilabo bwa cyôci aci, ne kabaakabucikilaku nansha umwe wabo muntwamu to. Bôbò bakaavwa baye bwalu baakatangila

cimanyinu, nenku bakaavwa baye; ke cyônsò civwàku pa bwalu abu ncyôci aci.

⁵¹ Kaa, mushindu mwine uvwabi bikengela bwa ekeleeziya leelu ewu kumonayi cimanyinu cya cikondo citudi ne mwoyi's we! Nyeemenaayi ne mwenu mwônsò ku Kalvariyo, bwa kupeta Mwoyi; kî nku ekeleeziya kampanda nansha, kadi kudi Yesu Kilisto. Disangaayi Nende Yêyè, kadi kî nne bulongolodi kampanda anyi ne twitabaayi wa ekeleeziya kampanda to. Disangaayi ne Kilisto, ne ikalaayi batwishiibwe ne n'Yêyè. Kanwena mwa kwangata anu cintu cyônsò naka to, kadi bikengela nwikale batwishiibwe ne n'Yêyè. Cikondo kaayipu cya didisanga's we!

⁵² Mpindyewu, tudi tusangana ne bôbò baakabenga Maasiya ne baakadisanga ne baakadyenza nsangilu, ne baakenza... dîyi kampanda dipunga munkaci mwabo dya ne muntu nansha bamwamba ne nganyi yêyè anu mudidinge mwakidile Yesu bu Muprofeta, uvwa ne cya kwipaciibwa mu ekeleeziya. Nudi bavuluke nsongalume uvwa mpofo uvwa musômbe ne mêsù mafofome awu anyi? Ke bayiidi kwambabo ne: "Udi mwenze mpekaatu ke nganyi? Nyêyè anyi, anyi ntatwëndè, anyi mmamwëndè?"

⁵³ Ke Yesu kwamba ne: "Bwa mu ebu bwalu, kî mmuntu to; kadi mbwa byenzedi bya Nzambi byenjiibwe, bimanyiibwe."

⁵⁴ Nenku vulukaayi ne, mbambe ne tatwëndè ne mamwëndè kabavwa mwa kwandamuna to. Baakamba ne: "Bôbò mbamanye ne yêyè ewu mmwaneetu mulela, kadi katwena bamanye ne mmwondopiibwe bishi to." Bwalu beena Yuda bavwa bambe ne muntu yônsò wadidinga wâfyotola anu ne Yêyè m'Muprofeta awu, neipaciibwe.

⁵⁵ Kadi, nudi numona's, byenzedi bya Nzambi bivwa ne yêyè nsongalume awu kavwa wa mu cisumbu aci to. Ke kwambaye ne: "Mpindyewu, aci's mbwalu bwa dikema bwanyi mêmè panudi kanuyi bamanye ne Muntu ewu mmufumine penyi, kadi Pende's mmuntabeeje mêsù." Nwamonu anyi? Mpindyewu, yêyè uvwaku mwa kucyamba. Nwamonu's, ke civwa byenzedi bya Nzambi ncyôci aci. Yêyè wakondopiibwa, kwikalaye ne mubidi tumatuma, ne uvwaku mwa—uvwaku mwa kucyamba bwalu kavwa ne myonji ya ku mwaba kampanda mimuswike nansha. Pa yêyè ke pavwa byenzedi bya Nzambi byenzekele, ne ncyà bushuwa ne yêyè wakamona wende... bwa wende pende musangu wa madyatambalà mu nsômbelu wende.

⁵⁶ Mpindyewu, beena Yuda baakadisanga bwa kulwisha Yesu ne—ne buuMaasiya Bwende, ne Mukenji Wende wa Maasiya. Tudi tumona cintu cimwecimwe aci munkaci mwa kwenzeka mpindyewu, anu cintu cimwecimwe aci menemene. Communisme nyewu udisanga bwa kubutula ekeleeziya, ne mushindu umwepele udiye...mpaanyima paa ekeleeziya

mumane kudisanga pende, mu Nsangilu wa Maekleeziya, Nsangilu wa Maekleeziya wa Buloba bujima, bwa kuvila ne kubutula Mukenji, Dîyi! Bôbò bábèngi Dîyi, ekeleeziya yábèngi! Kabeena mwa kuDiitaba to bwalu Didi dilwishangana ne twitabaayi yabo ya cyena mangumba; Makunji a Kapyra àdi mafwanyine kwikala malembelele munkaci mwetu nansha ôwò miikale bûngi kaayi. . . munkaci mwa cisamba, anyi nansha bantu bûngi kaayi biikale. . . bintu bûngi kaayi bifwanyine kudyanjila kwambiibwa ne byenzeke, ne bimanyinu binene byônsò byakalayaYe bya dituku dya ndekeelu abi; bôbò kabeenaku mwa kwitaba to.

⁵⁷ Ke bwa cinyi, badi munkaci mwa kudisanga mpindyewu, ne mpaasata wenu ewu ne bakwabo badi mwa kunwambila, bàdi bàbalà abu, bwa ne badi. . . badi ne nkwaka wa bukwântèndeleeleu wa buloba bujima. Ne. . . kudi mwambi wa ba-Luthériens kumutu kwa cyôci aci. Mbya ne, kwôkò kulwe dikenga dya cîmpicîmpi, difwanyine kwenzekela mu nyungulukilu emu; twètù katuyi badisange ne nkwaka wa bukwântèndeleeleu awu to, pa dîbà adi ekeleeziya wetu kèna mwa kwikala kabidi ekeleeziya to, nenku badi mwa kukwata nende mudimu bu diyeeba. Anyi bu umwe wa ku twètù bânà beetu mwa kumona muntu kampanda ùpûnga ne lufu anyi mutapike, nenku uteeta bwa kumubeejaku ne dibenesha kampanda dya Nyuma, mbafwanyine kutwasa cingoma bwa bwalu abu; ncya bushuwa menemene. Badi mwa kutukosela bidimu dikumi mu buloko bwa bukalenge bwa cîsàngansànga bwa ne tudî bayiishe nî ncinyi nî ncinyi cyônsò, anu bwalu katwena cidimba cya nkwaka wa bukwântèndeleeleu awu to. Kanwenaku numona cimanyinu cya nyama wa lwonji anyi? Nwamonu anyi? Nwamonu anyi?

⁵⁸ Mpindyewu, nyewu tumona cikondo cya didisanga eci cyenda cilwa. Nwamonu anyi? Mpindyewu, tangilaayi! Ne pa dîbà adi ekeleeziya mmudisange bwa kulwisha Mukenji; ne pa dîbà didiye wenza nanku adi, matunga adi adisanga mu Communisme bwa kubutula ekeleeziya cyakabidi; anu menemene cyakenzaye musangu wa kumpala. Nwamonu anyi? Ncyeci cyenzeka cyakabidi.

⁵⁹ Bivwa bikengela bwa Izaleela kwanjiye kubenga Mukenji. Nenku paakabengabo Mukenji, ke pa dîbà adi busalaayi, nsòmbelu wa ditunga byakadisanga (bya matunga makwabo), kubwelabi ne kubutulabi ekeleeziya. Nenku leelu ewu, nyewu baadyombolu Mukenji wa Mukalenge Yesu, ne bāWûdyombòlù. Nenku mpindyewu, cikondo cyafiki cidi Communisme usanga buloba bujima bwa kulwisha ekeleeziya. Nwamonu's, bidi bikengela bwa kwikalabi mushindu awu. Mpindyewu, mbikole bipange ne mwa kukola bwa kubyamba's.

⁶⁰ Bivwa bikolele beena Yuda abu bwa kwitabuujabo. Kwambabo ne: "Mpindyewu lwâyi, bânà beetu, tudî tumona ne—ne Nzambi wetu—wetu udi neetu, ne pa nanku ne—netubwele mu

ntempelu. Nenku mpindyewu netusambile, nenku taatu wa cijila *Kampanda* ne taatu wa cijila *Kansanga* balombole disambila adi. Kangaayi ciibi cya cimenga aci!” Ke Titus kwimanaye, ne kwimanaye kaaba aku munda bu mwa cidimu cijima anyi ne ndambu. Nwamonu’s, mwikale anu mubatabaleele, kadi kubashipaye anu ne nzala’s. Kakuvwaku mwa kwikala nansha umwe wabo uvwa mwa kupatuka mu cimenga amu to; ke kufwabo, bafwa lwa nzala. Kadi paakalwaye kubwelamu ne kuupula bimanu abi, mashi kadi kutuutawu luboleela too ne pambelu miikale apweka menze bu misulu ya mâyi mu mwaba wakashipeelaye bintu byônsò bivwamu abi awu.

⁶¹ Mpindyewu, Mwanjelo wa Mukalenge ukaavwa mucyãmbè mu ciprofeta, kale wawa mu Dipungila Dikulukulu, ne mwambe ne ke civwa mwa kwenzeka. Nenku bambi bàvwà balombodi baa ntendeleelu abu, bàvwà ne cya kwikala bashaale pa kaaba kaabo pa ciine aci ne kwambila bantu cyôci aci abu, pamutu paa cyôci aci, paakimana Yesu munkaci mwabo, bôbò biine kabaakaMumanya nanshà to; kadi baakateeta bwa kwenza mushindu kampanda wa dikamà dya kalulù ne: “Anji twenzèlèbi dijimbu tũng, tumonebi mushindu—mushindu údidi dyenzeka! Tuleejebi cimanyinu tũng.” Nwamonu anyi?

Ke Yêyè kwamba ne: “Mêmè. . .” Mona’s, Yêyè’s nyewu mwenze bintu byàbúngì, kadi kabayi anu mwa kubimona to. Nwamonu anyi? Ne pa díbà adi paakalwabo kuMubenga bu wabo. . .Mukenji wa dituku adi, ke kubengabo Mukenji wa dituku adi.

⁶² Baakapanga kumona cimanyinu cya dituku adi. Nenku cimanyinu cya ciprofeta cya mu Bible cyakenjiibwa kumpala kwabo, kadi baakamba ne: “Tubwelaayaaku mpindyewu!” Bôbò’s bavwa bantu baa cijila. Bavwa bantu baudi kuyiku mufwanyine kufunkuna munu mu wabo nsòmbelu to. Kabavwa bafwanyine kwikala *cikampanda*, ne pashiishe—ne pashiishe kwikala mwakwidi to. Mwakwidi uvwa mufwanyine kushipiibwa, uvwa ufwanyine kwashiibwa mabwe kufwaye bwa kaacintu kakesee kana kônsò aka. Pa nanku yêyè bivwa bikengela kwikalaye ne nsòmbelu mukezuke, wa cijila. Kavwa mwa kucyenza to, bwalu uvwa washiiibwa mabwe anu bwa kaacintu kônsò naka. Nenku mpindyewu bôbò bavwa bantu banene, bantu baa cijila ku mèsù kwa bantu, kadi nansha nanku kubwelabo e kwambabo ne: “Mpindyewu, netwikale mwa. . . Twêtù mbàdi ne Nzambi, Nzambi mwine Utu neetu kacya munda mwa bikondo awu. Netubwele mu ntempelu Wende wa cijila amu.” Aci’s civwa ntempelu wa cijila wa Nzambi! Kadi, nwamonu’s, Yêyè’s ukaavwa mudyombodiibwe mu ntempelu Wende mwine wa cijila amu. Nwamonu anyi? “Netubwele mu nzubu wa Mukalenge. Mpindyewu nwênù bônsò beena Ebelu nudi bamanye ne twêtù ke cisa cisungula, ke citudi, muneemu emu. Ne Nzambi udi Nzambi wetu twêtù; Nzambi wa Abraham,

wa Izaaka, ne wa Yakobo. Yèyè awu udi neetu. Yèyè neatusungile kudi beena Peleshete badi kabayi batengula badi pambelu pàapa baba (muvwabo mwa kwamba's), beena Loomo ne beena Ngelika baba. Yèyè ke watusungila ku cyôci aci. Tubwelaayaaku mu nzubu wa Mukalenge!”

⁶³ Aci's civwa cyumvwika anu cilenga; kadi civwabo benze ncinyi? Yèyè Mwibaki mene wa nzubu awu's uvwa mwômô amu, mu mmwenekelu wa mukoonyi wa mabaya wa beena Ngalela wa mmwenekelu mupwekele, kadi bôbô kuMudyombola; pavwa Nzambi muMushindike bu Musanjeela Wende wa dîbà adi, ne bu Ditamba. Kadi bôbô kuCidyombola. Pa nanku masambila ônsò awu, meeki matooke ônsò awu, milambu yabo yônsò ayi kabivwaku ne civwabi byamba kumpala kwa Nzambi nansha. Bakaavwa babyènzènze! Kadi Nzambi kulekelaye bwa cilwilu cinene eci kudisangaci bwa kubibutula.

⁶⁴ Nanku tudi tumona leelu ewu ne, bu mudi maekeleeziya kupicila ku mangumba ne bikwabo, adi adyombola Dìyi dya Nzambi. Kî mbaswe bwa wèwè kubambila bintu ebi to, kadi maalu a mamanya paawu's adi mwa kubijaadika ku maafôtô ne ku bikwabo byônsò, kadi bôbô kabeena anu baswe cintu nansha cimwe cya dyenza bwa Cyôci aci to. Pa nanku communisme udi udilongolola bwa kuàbùtula, anu menemene mwakenza Titus, ne Bible mmwambe ne nebàcyènzè. Menemene!

⁶⁵ Mpindyewu, nudi numona mwaba utudi ne mwoyi anyi? Cikondo cya didisanga, patudi tumona bintu ebi munkaci mwa kudisanga. Kaa, tudi tupanga kumona bintu abi bwa cinyi? Nudi mwa—nudi mwa kutangila mu Mifundu emu ne kumona mwaba wakalayaYe cyôci aci, civwaYe mwa kwenza. Mpindyewu, nyewu tucimona munkaci mwa kwenzeka. Tudi tumona mu ekeleeziya cyakalayaYe bwa kwenza; nyewu tucimona munkaci mwa kwenzeka. Nyewu tumona matunga munkaci mwa kudisanga. Tudi tumona tusumbu munkaci mwa kudisanga. Tudi tumona ekeleeziya idisanga. Ncikondo cya didisanga. Ndîbà dya didisanga. Ke nyuma wa cikondo nyèyè awu: “Bikengela tudisangaayi.” Cintu cyônsò cyûdi wamba bikengela ciikale civwijibwe bulongolodi; nansha bukalenge bwine kabwena bucyakidila to.

⁶⁶ Nudi bamanye, mêmè bu mwena mwabo . . . Mêmè bu mwena mwabo ncyèna, bu mwena mwabo wa États-Unis, nansha nanku mêmè—mêmè . . . udi mufwanyine kumpa shekè wa ndola itaanu ne mêmè nciyiku mwa kudidinga kufundapu dîna dyanyi to. Nwamonu anyi? Nwamonu's, ncyèna mufwanyine kucyenzaku to. Nwamonu's, ncikondo cya didisanga. Bikengela byônsò bipicile mu didisanga dya mushindu kampanda, ne diine didisanga adi ke cintu mene cidì citwala cimanyinu cya nyama wa lwonji. Nwamonu anyi? Ncikondo cya didisanga, ne cidì cikwata mudimu ciya buludi too ne mu cyôci. Nudi mwa kucimona ne bitooke tòò ne enu abidi, bu nwènu mwa

kucitangila. Ncikondo cya didisanga, cìdi bintu byònsò munkaci mwa kudisanga.

⁶⁷ Mwena Yuda—beena Yuda baakadisanga bwa kulwisha Yesu, bu wabo—bu wabo Maasiya. Ke bwa cinyi, tudi tumona cyàkenzekà. Tudi tumona cintu cimwecimwe aci mpindyewu, communisme mwikale udisanga bwa kubutula ekeleeziya, paanyima paa ekeleeziya mumane kudisanga mu Nsangilu wa Maeeleeziya wa Buloba bujima ne uteeta bwa kubutula Mukenji, Dìyì dya Nzambi. Badi bateeta bwa kuWumusha. Cintu cimwepele cidibo mwa kwenza cidi anu kudyenza bòbò biine nsangilu, bwalu mbatapuluke; kasumbu kakese apa, ba-Méthodistes, ne ba-Baptistes, ne ba-Luthériens, ne ba-Presbytériens, Église de Christ, ne bikwabo bya mushindu awu. Kabeenaku mwa kwenza cintu nansha cimwe to, bwalu *ewu* nealwishangane ne *ewu*, *ewu* ulwishangana ne *mukwabo*, malongesha abo mmashiilangane bikole anu mudi esete ne wesete. Nwamonu's, kabeena mwa kucyenzaku to. Kadi padibo anu badisanga, mwinshi mwa mutu munene umwepele, apu kaayi's cisuku cyädikongo. Cisuku cyädikongo pa dîbà adi.

⁶⁸ Mushindu awu ke udi beena Katolike mu bwobumwe bwa menemene, Katolike kaa cyena Loomo, mu bushuwa bwa bwalu badi mu bwobumwe kampanda, badi . . . ciibungì cidi n'Katolike kaa cyena Loomo; beena Ngelika ne beena Katolike bakwabo kabeena—kabeena bungì bumwe ne beena Katolike kaa cyena Loomo to. Mpindyewu badi badisanga, ne ke bwa cinyi badi wa taawu wa maawu. Nansha cinyi cyenzeke, paapà awu ke mutu mupungila makunyi mu byònsò. Nwamonu anyi? Nenu nansha cidi muntu mukwabo kana yònsò wamba: “Yèyè ngudi kayi mwa kupangila; yèyè's ke—yèyè's ke—yèyè's ke mupinganyi wa Nzambi, kwajiki; yèyè's ke cindonda cya Nzambi; yèyè's ke udi ne bukookeshi pa iferno, Dyulu, ne mpurgatoriyo.” Nwamonu anyi? Pa nanku kakwena cidi mwa kwenjiibwa mu *abu* bwalu to; cyònsò cidiye yèyè wamba aci, ke cidi ne cya kwenjiibwa.

⁶⁹ Mpindyewu, beena Mishònyì badi munkaci mwa kudyenzela wabo mutu anu mushindu awu, mushindu umweumwe awu. Kadi Bible kèna wambaku ne kuvwa cimfwanyi cyakenzelabo nyama wa lwonji anyi? Cimfwanyi ncinyi? Ncintu kampanda cifwanangane naaci, cyenjiibwe bu cyôcì aci. Ke cyôcì aci, cintu cimwecimwe aci. Ncinyi ciine aci? Mu kudisanga kwabo, ne cyôcì eci ke nyuma wa cikondo, n'*didisanga*.

⁷⁰ Biikale badisanga mpindyewu, bateeta bwa kubutula Mukenji. Badi baWubutula bishi? Mmushindu kaayi udibo bafwanyine kubutula Dìyì dya Nzambi? Badi mwa kuDivwija kadiciyi ne bwenzeji to, kadiciyi ne bwenzeji to, mu kwangata kwa bilele mwakenzabo kale wawa ku cibangidilu, nenku bavwija Dìyì dya Nzambi kadiciyi ne bwenzeji to. Nwamonu's, badi bamba ne: “Kaa, aci's...Mu bulelela bwa bwalu,

twamb'eku twamb'eku, . . .” Nudi numona mwaba ùdì mukaji udi mwena dyabulu ewu udi uteeta bwa. . .yèyè. . .Nyewu ngápù mene dìnà dyende mwoyi mpindyewu; bu mêmè nansha mwa kudivuluka's. Yèyè. . .Ndi nteeta kwela meeji ku bantu bapite búngì be.

⁷¹ Mvwa ngeela meeji ku Miss Nation ewu dîngà dituku; mvwa njinga ne twikalapù ne mukwabo wa ujuuka bu yèyè awu. Ewu ke wâkabwela mu binwinyi bya maala kadi kukâtusha wîskî, ne kwimansha pambelu bibejibeji bivwa bilamika ku bimanu ne bintu byônsò bya mushindu awu. Bwa cinyi mukaji kampanda kêna mwa kajuukaku leelu ewu mushindu awu, ne kupatuka pambelu apa kupanda bimwe bya ku bimfwanyi bya bakaji biikale butaka baa cisa cyende yèyè mwine aba ebi, ne bintu bya mushindu awu? Aci, kabacyena naaci kabidi to.

⁷² Mpindyewu, kadi mukaji ewu, mwena dyabulu, wâkamba ne—ne “Bible kêna ukumbanangana ne mukanda wa mêyì makulu a ditunga to, bwa kumubala mu tulaasa twa bantu bônsò,” ne bintu bya mushindu awu.

⁷³ Mpindyewu badi kabidi, ne nukaadiku bamone cikwabo eci, bakaadi bateeta kwamba mpindyewu, ne balongi biine banene baa Mifundu abu, mbajuuke e kwamba ne “kakuyi mpatà to ciibûngì cya ciprofeta cidi cyambiibwe mu Bible aci ciwva anu cya mafi, ne kacituku cyenzeke to.” Ne nwênù nukaadi anu bumvwe biine abi ne babibale. Nenku badi bateeta kwamba bintu byônsò cyanaana; nudi numona's, badi bateeta kubutula bwenzeji bwa Dìyì adi. Bu bôbò anu mwa kupeta mushindu wa kubutula ne kupingaja twitabaayi kampanda pa kaaba kaaDi anyi cintu kampanda cidi bantu naaci, aci cidi cimweka ku mèsù kwabo bu ne ke cidi citambe bwîmpè kupita Dìyì, pa dîbà adi badi baDibutula ku—ku bilele byabo bôbò. Nenku ke mushindu awu udibo bateeta kubutula Dìyì dya Nzambi, nku cidìidì cya cyena mangumba.

⁷⁴ Mpindyewu, ekeleeziya ne ekeleeziya udi ne cyende cidìidì cya sungasunga. Église de Christ udi ne cyende pende, ekeleeziya wa beena Kilisto udi ne cyende, ne ba-Baptistes, ne ba-Méthodistes, ne ba-Presbytériens; bônsò abu badi ne bidìidì byabo bishiileshiilangane. Mpindyewu, badi baseemena kule ne cyôcì aci mbwalu mbatapuluke. Nudi numona's, kacivwa mwa kwikala cyenzeke kumpala kwônsò eku to, bivwa bikengela kucyenzabo mpindyewu. Nwamonu's, ke cikondo cya didisanga ncyôcì eci, nenku mpindyewu ngukaadibu bacisanga pamwe ne bacikungwija bwa kumona ne cidibo mwa kupatukamu naaci ncinyi. Ekelekele, s'ncyenze anu bu kwenza dyâmpà ne munyiinyi wa kabalu, pamwe ne bukooya bwa mu cipanza cya dyelela bukooya, ne bikwabo byônsò bidibo basange pamwe abi; ne kubipayika kaaba kamwe, kadi kwelamu mpatata mibole ne bikwabo pamwe, bwa kumona ne ciwapatukamu naaci ncinyi. Ncya bushuwa ne mêmè ncyêna muswe bya nanku to.

To, mukalenge! Mushindu awu ke udibo benza. Nwamonu's, badi bangata bantu badi biitabuuja ne Yesu uvwa bwalu bukwatakaja, ekeleeziya udi witabuuja ne Yesu uvwa bwalu bukwatakaja awu; bakwabo, bamwe biikale biitabuuja ne Yèyè uvwa Muprofeta.

⁷⁵ Ewu wamba ne: “Matuku a bishima akaadi mamane kupita.”

⁷⁶ Mukwabo wamba ne: “Nkufwanyine anu kwikala cintu bu nanku awu.”

⁷⁷ Nenu biine byònsò ebi kaaba kamwe; kadi Bible pende's mmwambe ne: “Mmunyi mudi bantu babidi mwa kwendela pamwe piikalabo kabayi bapunge dîyi?” Nwamonu anyi? Mpindyewu, ke mushindu wa bwobumwe udibo naawu ngwòwò awu. Kadi kwikala ne taatu wa bunsantu kampanda wa kuteeka kumutu kwabu, nenku mwaba awu nudi nupeta cimfwanyi cya nyama wa lwonji, anu cidu Bible wamba menemene. Mpindyewu badi ne mwambi wa ba-Luthériens, kumutu kwabu. Ee, tudi tumona ne ncikondo cya didisanga. Ncintu cimwecimwe aci patudi twakulangana apa, Communisme ne bikwabo byònsò biikale munkaci mwa kudisanga pamwe; pa buloba, ne mu ekeleeziya ne bikwabo, munkaci mwa kudisanga.

⁷⁸ Tangilaayi bufuki. Kaa, ekelekele! Bufuki, bu nwènù anu mwa kutangila bufuki, budi bwenza cintu cimwecimwe aci. Bufuki ke kabala-matuku kaa bimanyinu kaa Nzambi. Nuvwa bamanye ciine aci anyi? Yesu wakabambila bwa kutangilabo bufuki. Mbù uvwa ne cya kwikala ukungula, nwamonu's, kuvwa ne cya kwikala bintu bishiileshiilangane, ne dizakala dya buloba mu myaba mishiileshiilangane, dikokangana dya mu matunga, bimanyinu mu dyulu, bimanyinu pa buloba, myaba yònsò kuvwa mwa kwikala bimanyinu bya cikondo cilwalwa eci.

⁷⁹ Tangilaayi mavuba. Kumpala kwa mavuba kutwalawu mvula wa cipupu, nudi bamanye mudici cyenzeka? Mavuba makeke makeke àbùngì adi adisanga, enza divuba dimwepele dinene. Ee, edi didi ne kandambu kaa lupeepele kenda kadisaka, dikwabo edi didi ne kandambu kaa lupeepele kenda kadisaka, ne mpeepele yònsò ayi idi ituuta cyapamwe, ne pashiishe ilwa kajuula mvula wa kajoona. Nwamonu anyi? Adi adisanga kumpala kwa kutwalawu mvula wa cipupu; bikengela ènzè nanku awu.

⁸⁰ Tangilaayi mùtù mabata ne byòkosò bidisanga kumpala kwa kuumukabi mu ditunga dyabi. Nwamonu anyi? Bitu bidisanga. Udi mwa kubimona bibuuka byumuka ku edi dijiba biya ku dyadya dijiba, byumuka apa biya pààpa, byònsò biikale bidisanga. Bidi bidisanga, bidilongolola bwa dibuuka dyabi. Nwamonu's, cidu anu . . . aci's mbufuki, ne Nzambi ngwâkafûka bufuki abu, ne bufuki budi bukwata mudimu bilondeshile ndongamu wa Nzambi. Mmukenji, mukenji wa Nzambi udi

kawuyi mufunda to, wa ne bufuki bwikale bukwata mudimu bilondeshile mukenji Wende.

⁸¹ Mbyenze anu bu mùdì, patudi twakula mu diyishi dya ku citalu, dya ne màyi a mu mucì àdì àpwekà abwela mu majambu awu, kwinshi menemene kwa muji wa mucì, bwa kushaalaku too ne ku dibiika dya ku lufu mu movu wa bintu bitoloka. Aci's mmukenji wa Nzambi. Kakutuku meeji kampanda adi mwa kwambila màyi a mu mucì awu bwa kupwekawu kwinshi aku to; kwèna mufwanyine kuàkàmisha to, kwèna mufwanyine kuàkòka to. Kakwena mushindu nansha umwe wa kucyenza bîmpè kutamba mudi Nzambi ucyenza to. Nzambi ngudi ne mushindu mupwangane. Pa nanku padi dibeji dipoopoka, pa dîbà adi Yèyè udi upwekesha màyi a mucì awu mu majambu bwa kuàsokoka. Bu mwakamba Yobo ne: "Unsokoke mu majambu too ne piikala ciji Cyebe cikole cimane kupita." Nwamonu anyi? Adi apweka kwinshi aku bwalu mmukenji wa bufuki, kumpala kwa mashika makole. Tangilaayi numone mpindyewu mukaadi mabeji abanga kumata. Bwa cinyi? Mmukenji wa bufuki.

⁸² Mabata neadisange, dyònsò dya kudiwu, ne adikungwija manyungulukile mulombodi. Mwòmò amu ôwò neamanye mu mushindu kampanda anyi kansanga, mèmè ncyèna mumanye mudiwu acyenza to, kadi ôwò mmamanye ne kaadibata kalume kaka ke kalombodi. Ne kalumyana aku, ôwò awu adi adisanga ònsò ne adikungwija makányungùlùkile kòkò aku, ne abanda buludi muulu mu mpepele. Ne kòkò aku nekiikale mwa... paaku kacya kakatuku kanji kuumuka mu dijiba adi to, kadi nekaye buludi katangile ku Louisiane anyi ku Texas ne mwàkù mwònsò, kùdì budimi bwa loosa busanganyiibwa. Nwamonu's, kumpala kwa ôwò kubuuka, bwa kuumukawu kwabo kwàkaàlelelèbo mu cidimu aci, adi adisanga. Amen! Ke bwalu abu's; adikungwija alonda kalombodi kaawu.

⁸³ Lutatu lùdì kudi muntu, ndwa ne, katu yèyè umanya mulombodi wende to. Eyowa's, mukalenge. Neadikungwije bòbò balonda dingumba kampanda, nebadikungwije balonda mwepiskopo anyi muntu kampanda, kadi kabaakudikungwija balonda Mulombodi, Nyuma Mwîmpè mu Dìyì to. Nwamonu anyi? Badi bamba ne: "Kaa, ee, ndi nciina's ne nkwèpì kùngààvwà kushaala mukoleshi wa maalu; ndi nciina ne nkwèpì kùngààvwà kubwela mu njila mubi." Kakaa, kadi ke wèwè awu's! Kadi bu kaadibata kakese aku kambe ne: "Ncyèna anu muswe mushindu udi kalombodi aku kalama masala ààkù awu to. Ncyèna ngeela meeji ne nènkalondè to." S'neufwe mashika. Wèwè's nebakubucikile muntwamu, pawikala kuyi mubuuke pamwe ne—pamwe ne makwabo awu padiwu abuuka apu. Adi adisanga pamwe, ne bufuki mbudi bwenza nanku.

⁸⁴ Byòkosò bitu bidisanga, bidikungwija bilonda mulombodi wabi; bitu byenza cintu cimwecimwe aci.

⁸⁵ Nukaadiku bamone mbulubulu patuyi ilwa mbimbimbi apu anyi? Mbulubulu itu idisanga, kumpala kwa kulwayi mbimbimbi, minyungulukile ciimamwëndè wa mbulubulu. Neya bushuwa. Nenku kuyaayaci aku, ke kuyaayayi paayi. Eyowa! Idi yenza cinyi? Idi idisanga kumpala kwa kulwayi mbimbimbi. Menemene; kantu ne kantu kônsò kaa mu bufuki!

⁸⁶ Mishipa itu idisanga kumpala kwa cimwangi cya mu movù wa bintu bitoloka. Mu mbû mwamwa, udi mwa kuyisangana; ya minene yaya. . . itudi tubiikila ne “nya milundamane” ayi, tûlebà atu. Padiyi ibanda mwaba wawa, kumpala kwa cimwangi aci kwenzekaci, neuyimone yenda mu bisumbu bya makumi a binunu, mu mbû mwamwa, ilwa yenda inyunguluka yenda inyunguluka; mu mâyi a mukele awu, kadi paayi mmishipa ya mu mâyi matalale. Kadi ke yôyi ilwalwa eyi yenda ibanda ne mâyi matalale awu, bwa kubanda kuya bwa movù wa dyela dya mayi. Idi ibanda kuntwaku ikeela mayi, ku bidimu bitwe ku binaayi binaayi byônsò, nenku ifwa padiyi anu imana kwela mayi. Kadi paayi’s mmimanye ne iyaaya kuntwaku mbwa kwfwa, ne wêwè kwêna ne cintu nansha cimwe cyûdiku mwa kuyiimanyika naaci to. Yôyi neyitupike bibandilu bya mishipa abi ne bintu bikwabo byônsò, ibanda iya kuntwaku, mimanye ne iyaayaku mbwa lufu lwâyî. Kadi mukenji wa bufuki ngudi uyenzeja nanku awu, mimanye ne iyaaya kuntwaku mbwa kwela mayi mu mulundu, ne kufwa. Nenku ya myânà ilwa paayi, ne cintu kampanda ciyisanga pa dîbà adi, ke ipatuka iya mu mbû. Ndidisanga! Mmukenji. Kwênàku mwa kupita mukenji wa Nzambi bukole to.

⁸⁷ Matunga adi—adi munkaci mwa kukosoloka, bwa cikondo mpindyewu citudi tumona ne—ne adi ne cya kwenza cyôci eci. Tudi mu njila wa cimvundu cya matunga. Tudi tumona matunga miikale akosangana malanda. Ku cidimu ne ku cidimu, tudi tusangana ne *edi* ditunga mbadisukumine mu communisme; *edi* diikale badisukumine mu communisme. Kadi anu muneemu mu ditunga dyetu twêtù emu, nditubudiibwe masoso masoso kudi communisme, ne yèyè ke wângata bukookeshi! Nwamonu’s, ke cyenzaye, kakuyiku mushindu nansha umwe wa kumwimanyika to. Bwa cinyi? Kabingila kamwekamwe kavwa kenza ne kakuvwa mushindu wa kwimanyika Titus aku. Bantu mbabenge Nzambi ne Dîyi Dyende. Eyowa’s, mukalenge, pa nanku nebâcyênzè, ne twêtù tudi tucimona mu njila.

⁸⁸ Mêmè, pa ciibidilu, ntu ngangata mêbà kî mmângî kî mmângî abidi; nyewu nkaadi mumane kwangata tusunsa makumi asatu, anu mpindyewu ewu. Nwamonu anyi? Kadi bwa kubweja byônsò ebi, ndi anu ngenda ndiipata. Nwacilongaayi panwikala baalukile mu mênù.

⁸⁹ Monaayi, badi mpindyewu mene munkaci mwa kudisanga. Wêwè udi wamba ne: “Mwaneetu Branham, aci neya bushuwa anyi?” Badi bakuupuka ku Mvita ya Harmaguédon; ki

cyenzabo menemene. Nwamonu anyi? Nenku badi munkaci mwa kudisanga bwa cyôci aci mpindyewu mene. Ke bwa cinyi tudi ne O.N.U ne byônsò bitudi naabi ebi. Beena ku Wesete biikale badisanga bwa kulwisha Beena ku Esete, communisme ne bikwabo, byônsò bidi munkaci mwa kudisanga. Ekeleeziya idi munkaci mwa kudisanga. Bintu byônsò bidi bimweka anu ne bidi munkaci mwa kudisanga. Bidisanga, biikale munkaci mwa kudisanga pamwe, tudi tumona nanku.

⁹⁰ Kabidi, padi diine didisanga dyônsò dya matunga edi munkaci mwa kwenzeka apa, bimanyinu ebi, bimanyinu bya matunga ebi, tudi tumona pa buloba apa, dizakala dya buloba mu myaba mishiileshiilangane, bintu bishiileshiilangane munkaci mwa kudisanga; biikale munkaci mwa kufikisha baa pa buloba ku didisanga, biikale bifikisha bantu ku didisanga, maekleeziya ônsò adisanga, bintu byônsò ebi. Ne padi didisanga diine dyônsò edi munkaci mwa kwenzeka apa, kudi didisanga dikwabo munkaci mwa kwenzeka. Amen! Ke cîndi muswe kunufunkwina patudi twakulangana apa.

⁹¹ Nzambi udi munkaci mwa kusanga Mukaji musela Wende. Yêyê awu udi munkaci mwa kudisanga, kuumukila ku Esete too ne ku Wesete, ne ku Nord too ne ku Sud. Kudi cikondo cya didisanga, ne cyôci aci ncidiku mpindyewu mene. Yêyê udi udisanga bwa cinyi? Bwa Dyambwibwa. Amen! Nzambi udi munkaci mwa kuMulongolola. Eyowa's mukalenge, udisanga! Ûdi uDisanga ne cinyi? Ne Dîyi! "Bwalu maulu ônsò ne buloba nebijimine, kadi Dîyi Dyanyi kadyakujiminaku to." Ûdi ùDisanga ne EMU MMUDI MUKALENGE WAMBA kayi utangila cidid dingumba kaayi anyi muntu mukwabo kaayi wamba to. Ûdi udisanga Yêyê mwine. Ûdi munkaci mwa kudilongolola. Bwa cinyi? Yêyê udi Mukaji musela. Ncya bushuwa. Nenku Yêyê udi udisanga Yêyê mwine ne Mubaki Wende, nwamonu's, ne Mubaki udi Dîyi. "Ku cibangidilu kwakadi Dîyi, Dîyi dyakadi ne Nzambi, ne Dîyi dyakadi Nzambi. Ne Dîyi dyakenjiibwa mubidi ne dyâkasòmbela munkaci mwetu."

⁹² Nenku Ekeleeziya ne Mukaji musela ne Dîyi bidi munkaci mwa kushaala umwe mu mushindu wa ne, Dîyi Dyôdi diine didi munkaci mwa kwenza byenzedi bya Mubaki. Amen! Nudi nucimona anyi? Didisanga! Kabiciyi kabidi bya ne: "Kudivwija mwena ekeleeziya" to; kabiciyi kabidi bya *cikampanda* to, kadi kunyeema bintu byônsò ne kwikala muswikiibwe kudi Yesu Kilisto. Nwamonu anyi? Ncikondo cya didisanga. Nzambi, mwikale usanga Mukaji musela Wende, uMwaluja; anu menemene. Mwikale usanga Mèyi a mulayi Wende.

⁹³ Tesalonika Mwibîdi, nshapita mwi2; Ûdi wamba, nshapita mwi5 ewu udi wamba ne: "Bansantu bàdi balaale mu lupwishi lwa buloba nebabiishiibwe. Ne pashiishe netudisange naabo

(bàdì ne mwoyi abu, ne bavwa bafwe), netudisange kumpala mene kwa twètù kufika kuulu Kwaka,” bwalu Mukaji musela neikale mu kaabujima kende padiYe ukafika Kwaka. Aba bàdì ne mwoyi, bàdì munkaci mwa kudisanga ne Dîyì abu, ne aba bàkaavwà bamane kuya bàkaavwà benze ciine aci abu; ne Cyôci cyônsò aci cidì cidisanga, cyenza bwobumwe bunene bumwepele bwa didisanga kumpala kwa kuya kuulu Kwaka. Amen!

⁹⁴ Bikengela Communisme ajuuke, bikengela bintu bikwabo byônsò ebi bijuuke, ne bikengela ekeleeziya adisange kuntu kwaka, piikala bôbò abu . . . ne matunga awu bwa Nsangilu wa Maekeleeziya wa Buloba bujima; ne bikengela Mukaji musela adisange Yêyè mwine mwinshi mwa Dîyì dya Nzambi. Bwa kwenza ciine aci, Nzambi mmutume panshi apa cimanyinu cya mu Dyulu ne bikwabo, bìdì bijaadikilâ Ekeleeziya, bu mukaadiYe mujaadikile ditunga. Amen.

⁹⁵ Nzambi; cikondo cya didisanga! Eyowa's, mukalenge. Kaa, ekelekele! Mpindyewu, vulukaayi mpindyewu ne, kudi didisanga dya Dîyì (diikale didisanga cyakabidi), diikale dyâlujulula “Diitabuuya dyakafidiibwa musangu umwe kudi bansantu.” Diikale dyâlujulula! Bwa cyôci eci cimone mwa kwenjiibwa anu mu dituku edi. Cikondo cimwepele cìdici cifwanyine kwenjiibwa mmpindyewu mene. Cyôci aci kacituku cibündüdiibwe mwaba kampanda mukwabo nansha umwe to; mbakadyèlè mu dyenza dya mangumba bûngì cyanaana. Kadi mpindyewu, kaciyena cya dyenza dya mangumba bûngì cyanaana nansha, bwalu dibâ dyâkânyì bwa didisanga dya balume ne bakaji baa cisa cyônsò, baa diikala dyônsò, baa twitabaayi yônsò, byônsò abi mwinshi mwa Kilisto ku Dibatiiza dya Nyuma Mwîmpè ne kwalukila ku Dîyì.

⁹⁶ Cikondo cya didisanga bwa Ekeleeziya! Kaa, ekelekele! Kusanga kwa Dîyì dyônsò divwa ditangalaja myaba yônsò kudi malongolodi aa: kubangila anu kacya ku Nicée kwaka, Rome, paakavwijabo ekeleeziya wa kumpala awu bulongolodi, ke kuvwijabo Luther bulongolodi, kuvwijabo Wesley bulongolodi, kuvwijabo ekeleeziya mikwabo yônsò malongolodi. Ne mu kwenza kwa nanku, byakakengela bwa bôbò kwitaba twitabaayi kampanda, ne pashiishe pavwa Nzambi utuma cintu kampanda cikwabo, kabacivwa mwa kuCyakidila to. Ke bwa cinyi, kacivwaku mwa kwenzeka to too ne ku mpindyewu ewu. Kadi Nzambi utu mulaye ne, mu matuku a ndekele, “Diitabuuya dya baataatu nebâdyâlùjùlwilè Mukaji musela,” ne nebiikale mushindu ewu, ne kacivwa mwa kwikala cingà cikondo to anu cikondo eci. Tangilaayi numone ne ncimanyinu kaayi cya mu Dyulu, bu Dikunji dya Kapyà dilembelele munkaci mwetu, kabidi ne bimanyinu ne maalu a kukema bya Mukalenge Yesu Kilisto. Ne padiYe wakula neetu apa, Cyôci aci kaciyenaku cipangila bwa kwikala cipwangane mu kantu ne kantu kônsò

to. Amen! Pa dîbà adi tudi tumona ne tudi biimanyine penyi. Cikondo cya didisanga!

⁹⁷ Tudi tumona matunga adisanga, tudi tumona baa pa buloba badisanga, tudi tumona communisme udisanga, tudi tumona ekeleeziya idisanga; ne tudi tumona Nzambi udisanga Yèyè mwine ne Mukaji musela Wende, mu mushindu wa ne Yèyè ne Ekeleeziya badi cintu cimwe. Aleluuyah! Byenze anu mudi cipaapu cya musaka kwaka naka. Bushuwa's! Biikale badisanga; Nzambi udisanga! Bwa cinyi? Kacya kwônsò eku, kuumukila anu ku cikondo cya mbangilu cya ekeleeziya, Dikunji dya Kapyá kadiwaku dyanji kwikala munkaci mwa bantu to. Kacya kwônsò eku, kuumukila anu ku cikondo cya mbangilu cya ekeleeziya, kabatuku banji kumona bintu bitudi twètù tumona lelu ewu ebi to. Ne byôbì ebi mbilwe kukumbana mwa kwenzeka anu paalu Nzambi kutuma Bitampi Mwandamutekete apa ne kutupa cimanyinu ku Byôbì, ne kutuma Banjelo mwandamutekete panshi bafumine mu Dyulu; ne mulwe kwalujulula Dìyì divwa ditangalajiibwe mu mangumba awu adi, ne muswikulule ciine aci mu Dìyì dya Nzambi, bwa kutuulula Nyuma Mwîmpè Wende.

⁹⁸ Yesu mmwambe ne: “Nwênù bashaale munda Mwanyi ne Dìyì Dyanyi munda mwenu, pa dîbà adi nulombe cinudi baswe aci, nebânwènzèlèci.” Mwikale usanga cyakabidi Mukaji musela ne Dìyì, didi diikale Nzambi. Ekeleeziya ne Dìyì, kaciyi Ekeleeziya ne twitabaayi to, Ekeleeziya ne Dìyì; Mukaji musela ne Dìyì bisanga pamwe. Kaa, ekelekele! Èci. . . Kwalujulula cinyi? Diitabuuya dya baataatu baa mpenta wa ku cibangidilu, nwamonu's, dyakatangalajabo kudi cisumbu cya Luther. Kî n'Luther yèyè mwine to; kî n'Luther to, kî ng'Wesley to, kî mbajuudi banene abu to. Kadi paanyima paa bôbô bamane kuya, kuvwa kujuuka ekeleeziya kampanda, nenku bavwa . . . civwabo benza ne cyôci aci pa dîbà adi, bavwa bacivwija bulongolodi. Bavwa biitaba twitabaayi ne bikwabo, ne bavwa baashilapu lwendu baya. Kadi batangilaayi lelu wa Ndaaya ewu numone, mpindyewu baabwedi mu Nsangilu wa Maeeleeziya wa Buloba bujima awu.

⁹⁹ Mpindyewu, nudi numona's, kadi mu matuku a ndekeelu, nudi numona's, twètù tudi tumona bintu munkaci mwa kwenzeka mpindyewu bitu kabiyiku byenzeke kacya kwônsò aku to. Nwamonu's, ncimanyinu cya Nzambi, ne didisanga dyônsò edi ncimanyinu cya cikondo. Mpindyewu, tudi baswe kutangila cyôci aci ne ntema yônsò bwa kwikala batwishiiabwe bulelela ne tudi bacyũmwè. Bàlekela. . . badi balekela Dìyì dilelela bwa kwangata mangumba; bwa kwitaba twitabaayi ne mmwenu ya bantu bashiileshilangane pamutu paa kwangata Dìyì.

¹⁰⁰ Bwakabuulwibwa 10 mmwambe ne: “Mukenji wa mwanjelo wa mwandamutekete.” Mpindyewu vulukaayi ne, aci mpabwipi

menemene ne Mpungi Mwandamutekete, ne kudi banjelo mwandamutekete bàdì beela Mpungi Mwandamutekete. Ku cyôci aku nkutuyaaya kuupuka kumpala eku. Kadi vulukaayi mwaba awu, Cyôci aci ncyambe mu mushindu musunguluke menemene ne: “Wa mwanjelo . . .,” kacyi Mpungi wa mwanjelo wa mwandamutekete to, kadi “Mukenji wa mwanjelo wa mwandamutekete.” Nwamonu’s, kî mmwanjelo wa Mpungi to, mwanjelo wa Mukenji! Nwamonu’s, mwanjelo uvwa yêyè mwele anu mpungi cyanaana, mwanjelo wa mwandamutekete awu, mwanjelo wa Mpungi. Kadi eci cyôci cidi cyamba ne: “Mu matuku a Mukenji wa mwanjelo wa mwandamutekete,” nwamonu’s, piikala Mukenji wende mujike. Nwamonu’s, awu m’Mukenji wa cikondo cya ekeleeziya. Musangu ewu, pa dîbà adi yêyè mmufwanyine . . . Mukenji, kî m’Mpungi to, ne “bwalu busokoka bwa Nzambi (budi bufunda mu Dîyi abu) nebwikale ne cya kujika.”

¹⁰¹ Mpindyewu tangilaayaaku numone ne mmu dituku kaayi mutudi ne mwoyi emu! Tangilaayi Bitampi abi, mùdì cyôci aci cisangishe Dîyi dya Nzambi divwa ditangalaja adi, civwà Luther ne bakwabo bônso abu, bivwà balongolodi banene bapatukile abi; cyalùkile buludi ne cibileeje mu Bible, mwaba uvwabo bafwanyine kwikala; muntu ne muntu anu pa kende kaaba menemene, civwaye mufwanyine kwenza ne civwa cifwanyine kwenzekela ekeleeziya; civwaye mufwanyine kwenza, ne civwa cifwanyine kwenzekela ekeleeziya; bintu byônso byakashiilaye mu njila ebi. Nenuk pathiishe, mu dituku dya ndekeelu, patuvwa twètù katuyiku bamanye kantu nansha kamwe pa bwalu abu to, mudyanjile kutwambila ne cintu kampanda necyenzeke; ne mene bibejibeji ne bikwabo kumba kubibakula, ne utuuluka buludi ucibuulula ne uswikakaja maalu masokoka pamwe. Amen! Mwaneetu, aci’s ncyà dikema ne dyanyina bwanyi mêmè! Aci, bwanyi mêmè, cidi cijaalamija Dîyi. Amen! Ncyèna mêmè ncyuka cidi—cidi, anyi, ndi ncyuka bidi bantu bamba, badyelela meeji, cya bushuwa, kadi bwanyi mêmè eci ke Bulelela.

¹⁰² Byenze muvwa beena meeji abu, bafumina ku Baabulona, kwelabo lubila ne: “Yêyè awu udi penyi, udi mulediibwe Mfumu wa beena Yuda awu? Udi pa buloba, patudi twakulangana apa. Bikengela tuMupete.” Ncyà bushuwa. Ne ndi ngeela meeji ne Yêyè udi pabwîpî ne kulwa mu mushindu wa ne ndi mwa kwamba ne: “Monaayi, Mubaki nya’ ulwa! Ndi ngumvwa lubila lwa mundankulu!” Amen! Tudi menemene anu ku cikondo cya nshiikidilu. Kaa, ekelekele, dîbà ditudi ne mwoyi. Monaayi. Nwamonu anyi?

¹⁰³ Dituku kaayipu’s we! Cikondo kaayipu citudi ne mwoyi eci, bwalu busokoka bunene bwa Nzambi ebu bwikale munkaci mwa kujika; bwikale butwala Bunzambi, buleeja cidi Bwôbù abu; mushindu udi tusumbu tukese etu, tuye ku luseke tuMuvwije *cikampanda*, ne muntu kampanda muMuvwije *cikansanga*, ne

muntu kampanda muMuvwije *cikankenga*. Kadi Mwanjelo wa Mukalenge kutuuluka e kwela patooke tusumbu twabo twônsò atu, ne kupatulamu Bulelela abu, ne kuBuleeja. Kadi's ke Bwôbù abu, Bwikale bupwangane anu menemene, kakuyi mushindu mukwabo wûdi mufwanyine kupita ne bwalu abu to. S'ke Bwôbù abu, ke cidiYe ncyôci aci. Nwamonu's, dimiinu dya nyoka, bintu byônsò—byônsò bishiileshiilangane ebi bidi munkaci mwa bantu mu mushindu wa kawuyi wumvwika ebi. Nwamonu anyi? Ncinyi ciine aci? Yêyè uvwa ne. . . Eci ncimanyinu cya cinganyi? Kudisanga!

¹⁰⁴ CyakambaYe mu Maalaki 4 ncinyi? Ne nealujulule! Kwalujulula Diitabuujja dya mpenta wa ku cibangidilu, udyalujilwila bantu badi ne Mukenji wa mpenta umwèumwè awu, cimanyinu cya mpenta cimwecimwe aci, cileeji cya mpenta cimwecimwe aci, Nzambi umwèumwè awu, Bukole bumwebumwe abu, dilongesha dimwedimwe adi, bintu byônsò anu menemene, biikale ne dishindika dya Dikunji dya Kàpya dimwedimwe dyakeela Shawula panshi mu njila, pavwaye mu njila uya ku Damaseke adi didi munkaci mwetu leelu ewu, dyenza bintu bimwebimwe byakenzaYe mu dituku adi abi. Munkaci mwa kudisanga's!

¹⁰⁵ Tudi tumona matunga adisanga, tudi tumona baa pa buloba badisanga, tudi tumona ekeleeziya idisanga. Tudi tumona Mukaji musela udisanga, udisanga ne Dîyi. Bwa cinyi? Dîyi ndidi Nzambi. Ne bu mudi Dîyi. . . Bu mudi Mubaki (mwikale Dîyi), ne Mukaji musela (mwikale muteeleji wa Dîyi), Badi badisanga mu Bwobumwe. Badi badisanga bu mu dibaka. Nwamonu's, Badi badilongolola ku dibaka, ne Badi—Badi balwa Umwe. Dîyi dishaala wêwè, wêwè ushaala Dîyi. Yesu wakamba ne: “Mu dituku adi nenucimanye. Cyônsò cidi Taatu aci, ke cîndi Mêmè; ne cyônsò cîndi Mêmè aci, ke cinudi nwênù; ne cyônsò cinudi nwênù aci, ke cîndi Mêmè. Mu dituku adi nenumanye ne Mêmè ndi munda mwa Taatu, Taatu munda Mwanyi, Mêmè munda mwenu, ne nwênù munda Mwanyi.” Nwamonu anyi? Mu “dituku adi.” Dituku kaayi adi? Dituku edi! Tudi tujandula maalu masokoka manene a Nzambi miikale asokolodiibwa. Kaa, mushindu mwine wûndi munangepu ciine aci's we!

¹⁰⁶ Kaa, tangilaayi numone muvwa maalu a mamanya ne Dîyi kabiyiku bifwanyine kufwanyikijiibwa, mukaadibi leelu ewu emu. Kabivwa mwa kucyenzaku kwônsò eku to. Anu mpindyewu ke udibi bifwanyine kwenzeka.

¹⁰⁷ Monaayi, Yêyè wakamba ne, “bimanyinu bya mu dyulu, bimanyinu bya mu dyulu.” Maalu a mamanya, ne bimanyinu bya matunga; mpindyewu badi ne bimanyinu binene mu dyulu leelu ewu, bakaadi ne babandi baa mu mabulunga ne bikwabo byônsò. Kadi cidi biine babandi baa mu mabulunga aba benzelaku beena maalu a mamanya ncinyi? Cidi cibatudwila bwôwà. Kî mbamanye ne ndibà kaayi didibo bafwanyine kutuma cintu cya

mushindu awu muulu mwamwa e kulekelela bombes eyi, ne twètù bafwanyine kwikala katuciyiku kabidi to. Nwamonu anyi? Mpindyewu byôbì abi ke bimanyinu bidibo bapete, bintu bidi bikwacisha bwôwà pa kubimona mu dyulu. Nwamonu anyi? Badi naabi, missiles ya bombes ya mushinda ne bikwabo byônsò, bimanyinu bya mishindu yônsò.

¹⁰⁸ Nudi numona mwakatwabo ndondo ewu—ewu, dîngà dituku adi, bwa ne kabavwa mwa kutaayisha kabidi bombes to, kadi patudi twakulangana apa ke kubwelabo mwinshi mwa mâyi ne mwinshi mwa buloba eku, biikale bayiteeta anu mwabo ne kale. Nwamonu anyi? Badi batwa ndondo ne: “Katwakucyenzaku to, panwikala peenu nwamba ne kanwakucyenza (kadi dya twalukila ku mèètù nunku kadi kucyenza mushindu ewu; patudi bamanye ne nwênù peenu nudi nucyenza mushindu anu umweumwe awu kwenu aku).” Nwamonu anyi? Kakwenaku mene bwa nsongo to, bidi anu. . . kakwenaku dyeyemenangana munkaci mwabo to, kakwena—kakwena bwa nsongo to. Nudi mwa. . . Nwamonu anyi? Kadi muntu ne muntu udi anu ne bwôwà bwa mwinende. Aci’s ncimanyinu cya cikwacisha bwôwà.

¹⁰⁹ Maalu a mamanya ne bantu ne matunga mbipatule cimanyinu cya cikwacisha bwôwà mu maulu. Ncya bushuwa menemene. Mpindyewu, baciinangana muntu ne mukwende. Ne nkulwe cimanyinu cya mu dyulu cipèèbwa ba- . . . Monaayi mpindyewu, mbapete kabidi cimanyinu mu dyulu, cimanyinu cya cikwacisha bwôwà, muntu mubandi wa mu mabulunga; mmufwanyine kwikala ne missile wa bombe bwa mushinda, mufwanyine kubwacisha kadi kubutula ditunga dijima. Udi ubanda muulu mwamwa bu mubandi wa mu mabulunga, kadi kushaala mwimanyine mwômò amu. Kakwena cidi cibakanda bwa kucyenzabo to. Ncya bushuwa ne badi anu mwa kucyenza, badi. . . dîbà kana dyônsò didibo baswe kucyenza adi. Badi mwa kushiya ditunga anu lupwishi bu bôbò baswe kucyenza, kadi. . . mu tusunsa dikumi ne tutaanu kubangila ku mpindyewu. Nenku cidi muntu mwa kwenza aci, mukwabo udi mwa kucyenza mushindu umweumwe awu, yèyè pende. Pa nanku, nudi numona ne mbapete cimanyinu, kadi cimanyinu cya mushindu awu cidi cibakwacisha bwôwà.

¹¹⁰ Badi munkaci mwa kудisanga, bakungwija makole abo kaaba kamwe. Bantu badishikamine, nya’ bakungwija makole abo kaaba kamwe. Beena communisme biikale bakungwija makole abu kaaba kamwe ne Russie. Bantu bônsò; kadi muntu ne muntu udi ne bwôwà bwa mwinende. Nwamonu’s, s’ncimanyinu cya cikwacisha bwôwà aci. S’ncya bushuwa. Ke bimanyinu bya matunga mbyôbì abi, ne bikwabo.

¹¹¹ Kadi Ekeleeziya mmwakidile Cimanyinu cya mu Dyulu: Mubandi wa mu mabulunga! Amen! Yesu Kilisto, mu mmwenekelu wa Dikunji dya Kapyà; diine divwaYe mu

Dipungila Dikulukulu adi, diine divwaYe paakatuutakeenaYe ne Shawula pavwaye wenda upweka mu njila mutangile ku Damaseke kwaka adi, Yesu umwèumwè awu kaaba aka leelu ewu! Ne Dyôdi adi didi dyenza cinyi? Didi ditwadilangana bwôwà anyi? Didi ditwadilangana dinanga, didisanga dya muntu ne mukwende. Amen! Njyà kampanda bwa muntu ne mukwende. Didi ditwadilangana Dinanga dya Nzambi, kaa, ditusanga, ne ditubweja mu Mubidi wa Kilisto, mu bwobumwe bu Mukaji musela. Ke cidi Dyôdi adi munkaci mwa kwenza patudi twakulangana apa, didisanga dinene edi didi Nzambi . . .

¹¹² Badi munkaci mwa kudisanga, kasumbu *apa* bwa kulwisha kakwabo, kasumbu *apa* bwa kulwisha kakwabo. Apa ekeleeziya mmwimane pankaci paabo; nutangilaayi numone cidi cyenzeka, neadisange naabo. S'ncyà bushuwa menemene. Kadi, mpindyewu, tudi tusangana ne aci cidi citwadilangana bwôwà ne dilubakana.

¹¹³ Kadi Ekeleeziya, Mukaji musela, mbamusange yèyè kudi Nzambi umwepele, mwinshi mwa Nyuma umwepele, Nyuma wa Nzambi, mu Bwobumwe bumwepele bwa cijila bwa Nzambi, bwa kwikalaye Mukaji musela umwepele wa cijila bwa Nzambi. Ncyà bushuwa, bônso pamwe; bwobumwe bwa Mubidi. Mubidi awu mwikale mwindile bu Mukaji musela; bu—bu mudibi ne Cidi m'Mukaji musela, bu mutudi tudibiikila ne tudi Mukaji musela amu. Bwa cikondo cya didisanga cya Mukaji musela, Ekeleeziya udi utamba kwenda udisanga. Bivwa bikengela kujuulaci anu dinanga munkaci mwetu, mu mushindu wa katuyi mwa kushiyanganaku muntu ne mukwende to. Ncyà bushuwa. Paudi anu, kabiyiku bikengela bwa wèwè kwikala kusengeleela bantu bwa kusambila, kabiyiku bikengela bwa wèwè kwikala kubasengeleela bwa kukuukwila Nzambi, kabiyiku bikengela bwa wèwè kwikala kubasengeleela bwa kwenza cidi cîmpè to. Mbatambe kwikala mu dinanga nende Yèyè, mu mushindu wa ne kakwenaku cîngà cintu to.

¹¹⁴ Nudi nwelaku meeji kaayi bwa mwânà wa bakaji mutekete, nsongakaji wa citende mulenga kwîsù menemene, mwikale ne cya kusediibwa kudi nsongalume kampanda wa citende mulenga kwîsù udiye munange wamba kupaala mukupa, aci ciikale ne mushinga kudiye kupita too ne mwoyi wende mene, ne yèyè mumanye ne bakaadi anu pabwîpi menemene ne kuselanganabo? Pakaadi dituku dya dibaka adi diseemena, mukwacikwetu awu, nya' nzwambila's, neikale ukaadi anu "anyungulukile eku mbibi anyungulukile eku mbibi." Nwamonu anyi? Udi anu wenza kulongolola kantu ne kantu; udi udilekelela kudiye yèyè yônso. S'ncyà bushuwa. Cyônso cidi cisankisha mulume aci, ke cidiye anu muswe kwenza. Ee, mushindu awu's ke uvwa ukengela bwa Ekeleeziya leelu ewu, bwa nsòmbelu wetu watamba kwikala musokoka munda mwa Nzambi mu Kilisto, mutwa citampi mwômò amu kudi Nyuma Mwîmpè.

115 Cintu cîndi nnulongesha kaaba aka, nkunwambila bwa bimanyinu ebi ne bintu bishiileshiilangane bidi munkaci mwa kwenzeka ebi, ncyêna ne dîbà dya kucyenza mpindyewu to; nêncyênzè mu diyiisha dikwabo, bu Mukalenge mwa kwanyisha. Kadi kucidi kaacintu kakese kadi kapangike mu Ekeleeziya. Ne cyôci aci ncutudi baswe, kufika ku cyôci aci, ne mêmè nkaadi anu pabwîpî naaci mpindyewu. Nwamonu anyi? Ku cyôci aci nkutudi baswe kufika, bu . . . bikengela nùcyênzè. Nwênù kanuyi bacyênzè to, apu's kwajiki, nudi ne cya kucyenza. Bwalu tangilaayi, cikondo cya didisanga cikaadi pabwîpî, bwalu Nzambi udi munkaci mwa kusanga Ekeleeziya bwa kwikalaku Dyambwibwa bwa kuya ku dibaka bwa Didisanga Dinene: paadisanga Nzambi ne muntu bwa Cyendelele, paadisanga bifukiibwa bya cikondo ne cya Cyendelele.

116 Cyakenjiibwa musangu kampanda mu mmwenekelu wa Mwânà wa muntu pa buloba. Ne byakakengela bwa Yêyè kufila Mwoyi Wende bwa kutwala bukole kampanda, bwa kusanga bakwabo bantu ne Bukole bumwebumwe ebu, bwa Mukaji musela wa Yesu Kilisto. Nenku mpindyewu Ekeleeziya udi munkaci mwa kudisanga Yêyè mwine ku Mubidi wa Kilisto. Ûkaadi muDivwije mudishikamine, mukosoloke ne lukanu lwônso lwa lukeselukese, mwikale uDilongolola; biikale badisanga, didisanga munkaci mwabo; kaa, dinanga ne disanka, ne Nyuma Mwîmpè mwikale ukwata mudimu munkaci mwabo. Kaa, ekelekele, cikondo kaayipu's we!

117 Anu mutùtù tumona mabata adilongolola, tumona byôkosò bidilongolola, tumona nyama . . . mbulubulu idilongolola, tumona mavuba adilongolola bwa mvula, tumona bintu byônso; mùtùbi bidisanga, bwa disakiibwa dyabi dinene adi. Tudi tumona Nsangilu wa Matunga, matunga adisanga, adisanga mu communisme. Tudi tumona mudiwu adisanga mu Beena ku Wesete eku. Tudi tumona ekeleeziya udisanga, bakwabo bônso aba. Pa nanku kakuyi mpatà to kabivwaku mwa kwenzeka to, kakuvwa cingà cikondo civwabi bifwanyine kwenzeka mushindu ewu to; kabivwa bifwanyine kwikala mushindu ewu kukaadi bidimu makumi abidi to, kabivwa bifwanyine kwikalabi mushindu ewu to. Kabivwa bifwanyine kwikala mushindu ewu kukaadi bidimu dikumi to, bikengela biikale nunku anu mpindyewu mene. Nwamonu's, bwalu tusumbu etu ne bikwabo kabivwa bifike too ne pakaadibi apa to.

118 Mpindyewu tabulukaayi! Dinyukululaayi, ne lukasa lwônso, ne tangilaayi kuneeku numone mwaba utukaadi! Tukaadi penyi? Anu muvwa beena meeji abu, tukaadi anu batwe Diyi Dyende muunyima, ne Bukênkè bwa Mukalenge budi bukenkesha mu kajila keetu. Butumbi bwikalè kudi Nzambi mu myaba mitambe kutumbuka ya mu Dyulu. Ne butumbi bwikalè kudi Nzambi Udi mutupe Yesu Kilisto, Yêyè utudi banange, ne udi mutufikishe too

ne pa kaaba aka. Ne bu mutudi . . . Twètù tudi cisamba Cyende, cisamba ku mushinga wa Mashi Ende.

¹¹⁹ Kaa, ekelekele! Padi cikondo cya didisanga cilwa, tudi tutangila, bu mutudi tudisanga muntu ne mukwende mu myonji ya Nyuma Wende, tudi . . . Cidi mwa kwikala Nyuma Wende anyi? Cya bushuwa, Cidi n’Nyuma Wende. Bwa cinyi n’Yèyè? N’Diyi Dyende, ne Yèyè udi . . . n’Nyuma wa Diyì. Ne padi Nyuma awu wa Mulayi ulwa pambidi peebe ne ushindika ne uDileeja apa mene, Yèyè awu n’Nyuma umweumwe awu anyi? N’Yèyè uvwa ne Mòsà mu cipeela awu! N’Yèyè uvwa pambidi paa Yesu Kilisto awu! N’Yèyè uvwa mutuutakeene ne Shawula pavwaye mu njila wa ku Damaseke awu! Yèyè udi umwèumwè awu makeelela, leelu, too ne kashidi! Ne Yèyè udi wenza cintu cimwecimwe aci!

¹²⁰ Nenku tudi tumona matunga madisange, tudi tumona bamfumu baa ekeleeziya badisange, tudi tumona communisme mudisange, tudi tumona tusumbu twenda tudisanga, tudi tumona bintu byònsò ebi; ne mpindyewu tudi tumona Mukaji musela udisanga ne Diyì. Kaa, ekelekele! Ncikondo cìikalà bansantu ne cya kubiika ku lufu bwa kudisanga ne badi ne mwoyi, bwa kuya kadisanga ne Yesu Kilisto bwa Cyendelelee.

¹²¹ Nzambi atukwacisheku, muntu ne muntu, bwa tudisange ne Kilisto diloolo edi, netulekelele cyònsò citudi twikalangana, cyònsò citudi naaci, musuuka wetu wònsò mu kaabujima, mubidi, ne meeji, kudi Yesu Kilisto, ne kwindila cikondo cya didisanga aci.

Paadila mpungi wa Nzambi, ne dîbà
kadiciyiku,
Ne paabwayika dinda dya Cyendelelee,
dibalakana ne dilenga menemene;
Paabiika bafwe mu Kilisto ne paasangilabo ku
mwelelu wa dyamwamwa (ne Mukaji musela
udi ne mwoyi awu), bwa kwambwibwa
pamwe.

¹²² Tangilaayi didisanga! Nzambi usanga Ekeleeziya ne Diyì Dyende, Diyì ne Ekeleeziya, bwa bubidi bwabo kulwabo umwe ne: “Amba *cikampanda*, ne necyenzeke. Enza *cikansanga*, ne necyenzeke. Ke cyôci eci; ewu m’Mémè kumpala kwebe, Mémè ngudi ucijaadika ewu; m’Mémè mwikale neebe.” Eyo.

¹²³ Tudi tusangana mpindyewu ne cikondo cidi cilwa padi Mpungi awu udila, ne bansantu badi balaale kuntu kwaka abu, kabeena mwa kuvwijibwa bapwangane twètù katuyiku to; bwalu bwabo mbulaale kutudi twètù (Ebelu 11); ne piikalabo badisange, badi badisanga ne bàdì ne mwoyi. Ekeleeziya udisanga ne Diyì, pashiishe Ekeleeziya ne Diyì bidisanga, benda bashaala umwe. Bansantu bàdì bafwe ne bansantu bàdì ne mwoyi biikale badisanga bwa kwikala umwe; ne bònsò baya

pamwe bwa kudisanga ne Kilisto kwaka, bwa Didya dya Dibanji dya Mwànà wa mukooko.

¹²⁴ Neikondo cya didisanga, ne bimanyinu bidi bibuuka biya myaba yònsò. Bimanyinu bidi mu matunga, bimanyinu bidi mu communisme, bimanyinu mu Beena Wesete, bimanyinu mu Nsangilu wa Maekleeziya. Ne Cimanyinu cidi apa diloolo edi ku dyambulwisha dya Nyuma Mwîmpè, ne Dîyi dya Nzambi diikale dicishindika ne dicivwija Bulelela. Amen! Cikondo cya didisanga! Cimanyinu cya Cikondo cya Didisanga!

Twinyikaayi mitu yetu.

¹²⁵ Mukalenge Yesu, bu mudi mwoyi wanyi udi mukwate ne bya luse ewu mwikale utupika ne disanka, bu mûndi mmona mpunga bwanyi mêmè muntu mushindame ewu, kadi nansha nanku mpunga bwanyi mêmè ya nKumona ulwa mu lukongo elu; ya kwikala ne mwoyi ne kwikalaku mwimane mwaba ewu, ne kumona piikala Mpungi awu mwa kudila ne: “Ewu udi mukooyike, udi utungunuka ne kwikala anu mukooyike. Ewu udi mwakane, udi utungunuka ne kwikala anu mwakane. Ewu udi wa cijila, udi utungunuka ne kwikala anu wa cijila.” Èyi Mukalenge Nzambi!

¹²⁶ Ne pa kwela meeji a mutwikala biimane, mu katanci, mu mubunyi wa dîsù, piikala baa pa buloba kabayi mwa kumanya ne cidi munkaci mwa kwenzeka ncinyi, kadi dyakamwe, neumone kumpala kwebe, kumweneka bananga beebe baakamana kufwa abu, balwe bwa kudisanga cyakabidi neebe. Nenu netushintuluke mu katanci, mu mubunyi wa dîsù; ne netwangaciibwe muulu, cyapamwe, bwa kutuutakeena ne Mukalenge wetu mu mpeepele. Ne pashiishe kudisanga Nende, bwa kwikala kwòkò aku kashidi, ne kabiciyi kabidi bikengela bwa kuumuka mu Bwikadi Bwende to.

¹²⁷ Cintu bunenepu kaayi cîdiku leelu ewu, Mukalenge, cya kumanya ne mpindyewu tukaadi badisange ne Nyuma umwe. Nyuma umwe, Nyuma Mwîmpè, ukààdi mukwate Dîyi mu nzadi Yende awu, udi ubwela munda mwetu. Ne ncintu bunenepu kaayi, ndyèsè kaayi dya kutapuluka ne maalu ónsò a pa buloba, bwa twêtù kudisanga ne Yesu Kilisto. Ne pa kwela meeji ne dîngà dituku, mu mmwenekelu wa mubidi, ne mubidi mufwanangane ne mubidi Wende Yèyè mwine wa butumbi, netúkasombè ku meesa ku Didya dya Dibanji ne kwòkò aku netwikale badisange ne babwele Nende mu dibaka; bwa kwikala ne mwoyi bu Mukaji musela ne Mubaki mu bikondo byònsò bìikalà ne cya kulwa, mu Cyendeleele kacyi ndekeelu.

¹²⁸ Mukalenge Nzambi, swaku bwa eci kaciikadi bwa bantu anu meeji kampanda makwatakaja to, kadi swaku bwa cilwe cintu cya bushuwa mu mushindu wa ne nzala ne nyoota bijuuke munda mwa bantu bwa bôbò . . . padibo babala bibejibeji byabo,

batangila. . . bateeleja ku bisanji bumvwa maluba, ne biikale bamona ne ncikondo cya didisanga. Bimanyinu mbyebi bipodya.

¹²⁹ Mukalenge Nzambi, anu bu mutwākùlù bwa bakaji, bwa bivwabo mwa kwenza mu matuku a ndekeelu; civwà ekeleeziya mwa kwenza mu matuku a ndekeelu; ne civwà Bikondo bya Ekeleeziya mwa kwikala, ne civwà Bitampi mwa kwikala, bikwabo bintu byònsò ebi. Nenku nyewu tumona anu bu mwakadibi, mu matuku a Noa. Tudi tumona anu bu mwakadibi, mu matuku a Sodoma ne Lota, paakaDimanyisha Mwanjelo wa Nzambi mu mubidi wa buntu, wākadyà munyiinyi wa kànà kaa ngombe ne kunwa mabeele a ngombe, ne mudyè dyàmpà; ne wākiimana kuntwaku ne mwikale mwa kwamba bivwa byenzeka paanyima Pende awu. Ne Yesu wakamba ne cintu cyòci cimwecimwe aci necyenzeke ku dilwa dya Mwànà wa muntu.

¹³⁰ Mukalenge Nzambi, twamonu cipaapu cya musaka, mushindu utudi tuciibaka kuntu kwaka, ne twamonu mutudi basakidileku bintu ebi; ne tudi tusangana ne tukaadi ku cikondo cya nshikidilu, bindile Dibwe Dinene dya mu ditumba. Butumbi kudi Nzambi's we! Tudi tulomba, Taatu, bwa Wêwè utabulujeku bantu, ne lukasa lwònsò mpindyewu, ne utukungwijeku pamwe, ne dinanga dya difwana dya Nzambi ne kaneemu bwa Yesu Kilisto ne bwa muntu ne mukwende.

¹³¹ Piikalaku kampana mwaba ewu kayi ne ditekemena adi disòmbè munda mwebe, udiku mwa kwela cyanza muulu kudi Nzambi wamba ne: “Mukalenge Nzambi, nsangeku Neebe, nsangeku Neebe” anyi? Nzambi akubeneshe, mwaneetu wa balume. Nzambi akubeneshe, ne wêwè, wêwè; eyo. “Nsangeku Neebe, Mukalenge.” Eyowa! Kaa, ekelekele!

Matunga adi akosoloka, Izaleela udi
utabuluka,

¹³² Tangilaayi numone Izaleela kuntu kwaka, mudisange. Izaleela, muumukile eku ne eku pa buloba bujima, walu bwa kudisangabo; bwa kudisangabo ne patudi twakulangana apa bakaadi ditunga. Bakaadi ditunga didisange: biikale ne dibendela dyabo bôbò, lupetu lwabo bôbò, cilwilu cyabo bôbò, bintu byònsò; piikalabi ne bavwaku badisange kacya, ke mudibo mpindyewu. Izaleela mudisange, Loomo mmudisange, ekeleeziya mmudisange. Ne Mukaji musela udi munkaci mwa kudisanga, amen; ne dilwa dya Disangila Dinene adi. Ncinyi aci? Byònsò bidi byenda bitangile ku Cimanyinu aci, Cimanyinu cinene cya mushinga aci, Yesu ne Mukaji musela Wende biikale badisanga bu umwepele.

¹³³ Taatu, Nzambi, filaku mabeneshà àndi ndombela bantu abaa, ne swaku tudisange Neebe mu myoyi ne mu nyuma, padibo beele byanza byabo muulu apa, bajinga cyòci aci. Mukalenge Nzambi, tukezuleku ne tuvwijeku Beebe Wêwè; enzaku nanku, Mukalenge. Ke cyònsò citudi bamanye ne citudi mwa kwenza,

nkulomba. Ne pashiishe Wèwè wākamba ne bu twètù mwa kucilomba ne kuciitabuuja, tuvwa ne cya kucipeta; nyewu ndi mucindile, Mukalenge. Ndi nKwela twasakidila mu Dìnà dya Yesu Kilisto. Amen.

Ndi muMunange, ndi muMunange,
Bwalu Yèyè wakannanga kumpala,
Ne wakampetela lupandu
Pa mucu wa Kalvariyo. (Amen. Kaa, ekelekele!)

Monaayi, Mubaki nya' ulwa!
Ndi ngumvwa lubila lwa mundankulu!
Netubande ne lubila, patwikala bônso
bakwate ku mimvumu,
Ne netutuutakeene Nende mu dyulu.

Ikala mutabale ne usambila, wèwè mwaneetu,
Bwa mukwabo kalu kwangata cifulu cyebe cya
butumbi,
Bwalu muntu wa civumu ne mutù wa
cimpingà
Kabaakuvwalaku nkanzu wa dibanji awu to.

¹³⁴ S'neya bushuwa. Twikalaayi badilongolole bwa lubila lwa mundankulu elu. Nelulwe pa dībà dyūdi kuyi mwelele meeji to. Nekulwe lubila, kī mmunkaci mwa badi kabayi beena kwitabuuja to; neciikale munsokontu. Kadi beena kwitabuuja, badi bindile cyôci eci abu: Nudi numona mitooto mudiyi yela mulongo anyi? Nwamonu anyi? Cyakalela cinyi? Anu menemene mwakenzaci musangu wa kumpala. Nwamonu's, s'ke twètù aba, bimanyinu bidi byenda bilwa.

Tudi tumona bimanyinu bya Dilwa Dyende
dibeneshiibwe munkaci mwa kumweneka,
Monaayi, tangilaayi mukaadi mabeji a mucu
wa mfigi asampila;
Evanjeeliyo wa Bukalenge ukaadi muye ku
ditunga ne ditunga;
Nenku tukaadi pabwîpi, ndekeelu udi mwa
kumweneka.

Pa dībà adi ne disanka dyônso, kule,
netukobole Mukenji wa dimweneka Dyende
dibeneshiibwe,

¹³⁵ Ncyà bushuwa anyi? Kaa, kukobola Mukenji wa dimweneka Dyende dibeneshiibwe! Ke cidi cikengela bwa twètù kwenza. Kwambila bantu bônso ne: "Dilongololaayi, nwikale badilongolole bwa kutuutakeena ne Nzambi." Amen! Mèmè ndi muMunange. Kaa, mushindu mwine wùndi muMunange's we. Mpindyewu, tujuukilaayi kuulu mpindyewu. Patudi twelangana mwoyi muntu ne mukwende apa, olola cianza ulabuleku muntu kampanda, wamba ne:

Too ne patwasangila! (Labulanganaayi
ku cyanza, mpindyewu)...too ne
patwasangila!
Too ne patwasangila ku makàsà a Yesu;
Too ne...

Wavuluka ne, udi mufwanyine kupeta dibiikila. Bidi mwa kwenzeka ne disangila dyetu dilwalwà diikale ku makàsà Ende.

Éyì Nzambi ikale neenu too ne patwasangila
cyakabidi!

¹³⁶ Mpindyewu, anji elaaibi meeji, kumpala kwa twêtù kusangila cyakabidi; kumpala kwa twêtù kusangila mu dyalumingu mu dinda, anyi mu diisâtù diloolo, bidi mwa kwenzeka ne...udi mwa kumona anu ne, nkupangike kampana. Nkupangike ewu nunku, ne yêyè mumbe muye. Kaa, paudi wela meeji ne bayeebe mmupangike, anyi ne mukajeebe mmupangike, ne—ne mukaj'a John mupangike, ne—ne—ne apa nunku bânà mbapangike. Byônsò mbyenzeke (cidi cyenzeke ncinyi?), pa dîbà adi wèwè mushaale!

Kaa, mmyadi kaayi ne mikemu pambilabo bajimine bwa cîikalà mwa kubavwila,
Baakeela mbwebwe ne mikuna mbila, (Byenze bu Izaleela, pa dyalukila bwa kubwela mu cimenga, ku ntempelu.)
Baakasambila kadi masambila abo akaavwa a dîbà dimane kupita. (Bavwa babenge Mukenji.)

¹³⁷ Kaa, mwaneetu, kwenjiku nanku to. Cyônsò cyûdì wenza, ikala mwimane ne dikima dyônsò bwa kiipacila! Eyowa's, mukalenge!

¹³⁸ Mpindyewu, too ne patwasangila, netwënzè nunku:

Angata Dîna dya Yesu wëndè naadi,
Bu ngabu ku diditacisha dyônsò dya mu meeji;
Pààkujìngà mateeta ku nseke ne ku nseke
yônsò, (Udi wenza cinyi?)
Eyela Dîna dya cijila adi mu disambila.

Dîna dya mushinga, Éyì dya bupole be!
Ditekemena dya buloba ne disanka dya Dyulu;
Dîna dya mushinga, Éyì dya bupole be!
Ditekemena dya buloba ne disanka dya Dyulu.

¹³⁹ Twinyikaayaaku mitu yetu mpindyewu, patudi twimbila mu matama apa:

Twinamina Dîna dya Yesu,
Tupona mikookwela ku makàsà Ende,

Mfumu wa bamfumu mu Dyulu...tuMwase
 cifulu cya butumbi,
 Paaajika lwendu lwetu. (Lwadyakujika, dîngà
 dituku.)

Éyì, Dînà dya mushinga, Dînà dya mushinga,
 Éyì dya bupole be!

Too ne patwasangila cyakabidi, Nzambi ikale neenu.

Ditekemena dya buloba ne disanka dya Dyulu;
 Dînà dya mushinga, Éyì dya bupole be! Dya
 bupole be!

Ditekemena dya buloba ne disanka dya
 Dyulu.



CIKONDO NÈ CIMANYINU CYÀ DIDISANGA LUA63-0818

(The Uniting Time And Sign)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyalumingu diloolo, matuku 18 a ngondo wa mwandamukulu, cidimu cya 1963, mu Branham Tabernacle mu Jeffersonville, Indiana, U.S.A. Ndyumusha pa mukaba wa mêtî ne dituuta ku cyamu mu kaabujima kaadi mu Anglais. Nkudimwinu wa mu Ciluba ewu mmutuuta ku cyamu ne mwabanya kudi Voice Of God Recordings.

CILUBA

©2017 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org